

የሃኒሳ ቆንጮሳ ጋሳ ቆፋ

የሃኒሳ ቆንጮሳይ የፌቲዳይ፣ አማኒያ አሳይ ዩሱስ ኪሪስቶስ ባንታው ጎዳ አሲዲ፣ ጌሻቴላን ዴዲዳ ጊሾ ኤንታ ሜቶይኔ ዋዩይ ጋኪዳ ዎዴና። የፌይ ወዲዲ ያሊዳ አይፌ ቆፋይ፣ አማኒያ አሳ ኡፋይሳይ ኩሜሲ ጊዳና ሜላ ኤንታ ሚንሴሲድ፣ ኤንታ ጋኪዳ ጎዳኔ ሜቱዋ ጊዶን ባንታ አማኑዋን ሚኒዲ ኤቃና ሜላ ዴንሴላናሳ።

ማፃፋን ዳሪያ ኪፊሌይ ዳርኔ ካሊ ካሊዲ ቆንጪዳ ቆንጮሳ አይኬስ። ሃ ቆንጮሳቲ ሄ ዎዴ ዴዲያ አሳስ ጌሌስ፣ ሺን ሃራታስ ፀራ ጊዲዲ ጋምዲስ። ኤንቲ አዴቲዳይካ ሌሚሶ አዳና። ሃ ማፃፋን ዴዲያ ታይቦቲ፣ ማካ ሚሼቲኔ ዶዓቲ ዴሬታኔ አያና ሜዴቴላታ ሌሚሶ። ማዝሙሬ አዝማቼይ ሲሚ ሲሚዲ ዩዌቴይሳዳ፣ ሄ ማፃፋን ዴዲያ ሁዔ ቆፋቲ ዱማ ዱማ ቆንጮሳታ ባጋራ ዱማ ዱማ አጌን ሲሚ ሲሚ ሺቂዶሶና። ሃ ማፃፋ ቢርሼላስ ዱማ ዱማ ቆፋይ ዴዲኮካ፣ ኢያው ሁዔ ቆፋይ ቆንጮ። ሄሲካ፣ «ያሳይ ጎዳ ኪሪስቶስ ባጋራ ዛሬሶና አጌን ባ ሞርኬታ፣ የላሄራ ጉጂዲ፣ ኢሲ ቶሆኔ ወርሴሲ ጋካናው ዎናና። ሄ ዎኑዋፔ ጉዩ፣ ኢያው አማኔቲዲ ዴዲዳ ባ ባጋታ አራሳ ሳሎኔ አራሳ ሳዓ አንጆ ላቲሳና» ያጌይሳ።

የሃኒሳ ቆንጮሳ አይፌ ቆፋታ

ጌሎ ቆፋ 1:1-8

ዩሱሲ ላፑን ዎሳ ኬላታ ጊዶን 1:9-20

ላፑን ዎሳ ኬላታስ የፌቲዳ ኪታ 2:1-3:22

አራታ፣ የሳ ማፃፋኔ ዶርሳ 4:1-5:14

ላፑን ማታሜታ 6:1-8:1

ላፑን ሞይዜታ 8:2-11:19

ዳዊያኔ ናምዑ ዶዓታ 12:1-13:18

ዱማ ዱማ ቆንጮሳታ 14:1-15:8

ላፑን ሃንቆ ፀዓታ 16:1-21

ባቢሎኔ ኩንዴሳ፣ ዶዓኔ ዎርዶ ናቢያ 17:1-20:10

ወርሴሳ ፐርዳ 20:11-15

አራሳ ሳሎ፣ አራሳ ሳዓኔ አራሳ ዩሩሳላሜ 21:1-22:5

ኩሻ ቆፋ 22:6-21

1 ኤሶን ሃናናው ዴዲያባ ባ አይሌታ ቤሳና ሜላ ያሳይ ኢያው ኢሚዳ ዮሱስ ኪሪስቶሳ ቆንጮሳይ ሃይሳ። ዮሱሲ ባ ኪታንቸዋ ኪቲዲ፣ ባ አይሊያ ዮሃንሳስ ቆንጮሲስ። 2 ዮሃንሲ ያሳ ኪታ፣ ዮሱስ ኪሪስቶሲ አሲዳባይ አዲዳባ ኡባ ማርካቲስ። 3 ሃ ኡባይ ሃናናው ዎዴይ ማቲዳ ጊሾ ሃ ቲንቢቴ ቃላ ናባቢያ አኒካ አንጄቲዳይሳ፤ ቃሲ ሃ ቃላ ሲዔይሳቲኔ ፃፌቲዳ ኪታ ናጊያ ኡባይ አንጄቲዳይሳታ።

ላፑን ኢሲያ ዎሳ ኬሳታስ ኪቴቲዳ ሳርሶ

4-5 ሃ ዳብዳቤይ፣ ዮሃንሳፕ፣ ኢሲያ ቢታን ዴዲያ ላፑን ዎሳ ኬሳታስ ፃፌቲስ። ካሴካ፣ ሃዲካ ዴዲያ፣ ሲንሳፊካ ያናው ዴዲያ ያሳፊ፣ ቃሲ ኢያ አራታ ሲንሳን ዴዲያ ላፑን አያናታፕ፣ ሄሳዳካ፣ ሃይቆፕ ዴንዶን ኮይሮ ጊዲዳይሳፊ፣ ሳዓ ካዎታ ሃሪያ አማኔቲያ ማርካ ጊዲዳ ዮሱስ ኪሪስቶሳፕ፣ አዶ ኬሃቴሳይኔ ሳርቴሳይ ሂንቴው ጊዶ።

ዮሱሲ ኑና ሲቆስ፣ ቃሲ ባ ሱሳን ናጋራ አይሌቴሳፊ ኑና ላዓ ኬሲስ። 6 ኑኒ ያሳ ኢያ አዋስ አሳና ሜላ ኑና ካዎቴሳ ካሂኔ አሲስ። ኢያው ሜሪናፕ ሜሪና ጋካናው ቦንቾይኔ ዎልቃይ ጊዶ። አሚንዲ።

7 ሄኮ፣ ዮሱሲ ሻራራ ዮስ። አሳ ኡባይ ሃሪ አቶሺን፣ ኢያ ጫዲዳ አሳይካ ኢያ ቤዓና። ሳዓን ዴዲያ አሳ ኡባይ ኢያ ጊሾ ዮካና። ሄሲ ቴማ ሃናና! አሚንዲ።

8 «ካሴካ፣ ሃዲካ ዴዲያሲ፣ ሲንሳፊካ ያና ጎዳይ፣ ኡባፊ ዎልቃማ ያሳይ፣ አልፋኔ አሜጊ ታና» * ያጌስ ጎዳ ያሳይ።

ጎዳ ቆንጮሳ

9 ታኒ፣ ዮሃንሲ፣ ሂንቴ ኢሻይ፣ ሂንቴራ ኢሲፊ ዮሱሳን ዋያ፣ ኢያ ካዎቴሳኔ ኢያ ዳንዳዓ ቤዓስ። ታኒ ያሳ ቃላ ጊሾኔ ዮሱሳባ ማርካቲዳ ጊሾ ፓዒዋ ጊያ ሃሳን ቴቆቲዳ ቢታን ዴዳይስ። 10 ጎዳ ጋላሳን ታ ጊሻ አያናን ሃሬታዳ ዴዳይስ፤ ታፕ ጉዮራ ዋይዜ ፑኖ ሜላ ጊታ ጊርሲ ሲዓስ። 11 ሄ ጊርሳይ ታና፣ «ኔ ቤዔይሳ ማፃፋን ፃፋዳ፣ ኢሲያን ዴዲያ ላፑን ዎሳ ኬሳታስ፣ ኤፊሶና፣ ሳሚርኔሳ፣ ጴርጋዋና፣ ቲያቲርና፣ ሳርዴሳ፣ ፊላዴሳፊያይ ሎዶቂያ ዮዳ» ያጊስ።

1:4-5 ኬሳ 3:14፤ ዮቆ 4:5 1:4-5 ኢሳ 55:4፤ ማዝ 89:27 1:6 ኬሳ 19:6፤ ዮቆ 5:10 1:7 ዳኔ 7:13፤ ማቶ 24:30፤ ማር 13:26፤ ሉቃ 21:27፤ 1ቴሴ 4:17፤ ዛካ 12:10፤ ዮሃ 19:34 * 1:8 አልፋኔ አሜጋ፣ ጊርሴ ዶናን አልፋኔ አሜጊ ኮይሮኔ ወርሴሳ ፒዳሌታ፤ ቢርሽሳይካ ኮይሮኔ ወርሴሳ ጉሱ። 1:8 ዮቆ 22:13፤ ኬሳ 3:14

12 ታኒ ታው አዲያ ጊርሳ ቤዓናው ጉዬ ሲማዳ ያምጥ ዎሲያ ላፑን ዎርቃ ኮጫታ ቤዓስ። 13 ሄ ኮጫታ ጊደን አሳ ናዓ ዳኔይሳ ቤዓስ። ኢ አዱሳ አፊላ ባ ቶሁዋ ጋሲ ማዲስ፤ ዎርቃ ዳንጮን ባ ቲራ ዳንጫስ። 14 ኢያ ሁዔይኔ ኢያ ቢናናይ ቦሳ ዶርሳ ኢኪሴ ሜላ ዎይኮ ሻቻ ሜላ ቦሲ፤ ኢያ አይፌይ ታማ ላጮ ዳኔስ። 15 ኢያ ቶሆይ ታማን ሴሪዲ ዞዲዳ ናሴ ቢራታ ዳኔስ፤ ኢያ ጊርሳይካ ጊታ ሻፋ ኮሺንቻ ሜላ። 16 ኢ ባ ኡሻቻ ኩሼን ላፑን ያሊንቶታ አይኪስ። ኢያ ዶናፔ ናምዑ ባጋራ ቃራቲዳ ማሺ ኬዮስ። ኢያ ሶምዶይ ሴታ ጋላሳ አዋ አይፌ ዳኔስ።

17 ታኒ ኢያ ቤዲዳ ዎይ ሃይቂዳ አሳዳ ሃናዳ ኢያ ቶሁዋ ማታን ኩንዳስ። ኢ ባ ኡሻቻ ኩሺያ ታ ቦላ ዎሲዲ፤ «ያዮፋ፤ ኮይርይ ዉርሴሳይ ታና። 18 ታኒ ዴዎን ዴዓይስ፤ ታኒ ሃይቃስ፤ ሺን ሄኮ ሜሪ ሜሪናዉካ ዴዎን ዴዓይስ። ሃይቆኔ ሲዶሌ ቁልገይ ታ ኩሼና። 19 ሂዛ፤ ሃዲ ሃኒያባኔ ሲንሳፊ ሃናናባ ኔ ቤዲዳባ ሃፋ። 20 ኔኒ ታ ኡሻቻ ኩሼን ቤዲዳ ላፑን ያሊንቶታኒ ላፑን ዎርቃ ኮጫታ ቢርሼሳይ ሃይሳ፤ ላፑን ያሊንቶቲ ላፑን ዎሳ ኬሳታ ኪታንቾታ፤ ላፑን ዎርቃ ኮጫቲ ላፑን ዎሳ ኬሳታ።»

2

ኤፌሶና ዎሳ ኬሳስ ኪቴቲዳ ኪታ

1 «ኤፌሶና ዎሳ ኬሳ ኪታንቹዋስ ሃይሳዳ ያጋዳ ሃፋ።

ባ ኡሻቻ ኩሼን ላፑን ያሊንቶታ አይኪዳይሲኔ ላፑን ዎርቃ ኮጫታ ጊደራ ሃሙቴይሲ ሃይሳዳ ያጌስ። 2 ታኒ ኔ አሱዋ፤ ኔ ዳቡራኔ ኔ ጌንጫ ኤራይስ። ኔኒ ኢታ አሳታባ ጌንጫናው ዳንዳዓቦናይሳ ኤራይስ። ቃሲ ሃዋሬ ጊዶናሺን ባንታና፤ ሃዋሬ ጌይሳታ ፒልጋ ኤራዳ ኤንቲ ዎርዳንቾ ጊዴይሳ ዴሚዳይሳ ታ ኤራይስ። 3 ኔኒ ጌንጫዳሳ፤ ታ ሱንላ ጊሾ ሜቶ ዳንዳዳዳሳ፤ ያኔታባካ። 4 ጊደሺን፤ ሃዲ ታ ኔና ቦሪያባይ ዴዒስ፤ ሄሲካ ኔኒ ካሴ ኔ ሲቁዋ አጋዳሳ። 5 ሂዛ፤ ኔ አይ ሜላ ጵቃ ቤሳፊ ኩንዲዳኮ አኬካ! ኔ ናጋራፔ ሲማ፤ ኔኒ ካሴ አሲያ አሱዋ አላ። ኔኒ ኔ ናጋራፔ ሲሞና ኢዲኮ፤ ኔ ያምጥ ዎሲያ ኮጫ ኢያ ቤሳፊ ኤካና። 6 ሃዲ ታ ኔና ናሺያ ኢሲባይ ዴዒስ፤ ታ ኢዲያ ኒቆላዌታ አሱዋ ኔካ ኢዳዳሳ።

1:13 ዳኔ 7:13፤ ዳኔ 10:5 1:14 ዳኔ 7:9 1:14 ዳኔ 10:6 1:15 ሂዝ
1:24፤ 43:2 1:17 ኢሳ 44:6፤ 48:12፤ ዮቆ 2:8፤ 22:13

7 ገሻ አያናይ ዎሳ ኬሳታስ ጊያባ ሲጻፍው ሃይሲ ዴዲያ አኒካ ሲዎ። ያኒያ አኒካ ዎሳ ጋናቲያን ዴዲያ ዴያ ሚሴ አይፊጤ ማና ሜላ ማታ ኢማና።

ሳሚርኔሳ ዎሳ ኬሳስ ኪቴቲዳ ኪታ

8 «ሳሚርኔሳ ዎሳ ኬሳ ኪታንቸዋስ ሃይሳዳ ያጋዳ ዓፋ።

ኮይሮይኔ ጩሴሳይ፣ ሃይቂዳይሲኔ ሃይቆፔ ዴንዲዳይሲ ሃይሳዳ ያጌስ።

9 ታኒ ኔ ዋያኔ ኔ ማንቆቴሳ ኤራይስ፤ ጊዶሺን ኔኒ ዱሬ። አይሁዴ ጊዶናሺን ባንታና አይሁዴ ጊይሳቲ ጫያ ጫሻ ታ ኤራይስ፣ ሺን ኤንቲ ዓላሄ ማባራን ዴዎሶና። 10 ኔኒ ኤካናው ዴዲያ ዋያ ባቦፋ። ዓላሄይ ሂንቴፊ ኢሶታ ኢሶታ ፓጫናው ቃሾ ኬሳን ዩጋና፤ ታሙ ጋላስ ጋካናው ሂንቴ ዋዩታና። ሃይቃና ጋካናው አማኔቲዳይሳ ጊዳ፤ ታ ኔው ዴያ ካላቻ ኢማና።

11 ገሻ አያናይ ዎሳ ኬሳታስ ጊያባ ሲጻፍው ሃይሲ ዴዲያ አኒካ ሲዎ። ያኒያ አኒካ ናምግንሶ ሃይቁዋን ቆሄቴና።

ጴርጋሞና ዎሳ ኬሳስ ኪቴቲዳ ኪታ

12 «ጴርጋሞና ዎሳ ኬሳ ኪታንቸዋስ ሃይሳዳ ያጋዳ ዓፋ።

ናምዑ ባጋራ ቃራቲዳ ማሺ ዴዔይሲ ሃይሳዳ ያጌስ። 13 ታኒ ኔ ዴዲያ ቤሳ ኤራይስ፤ ኔኒ ዓላሄ አራታይ ዴዲያ ቤሳን ዴዓሳ፤ ታ ሱንሳ ሚንሳ ናጋዳሳ። ሃሪ አቶሺን፣ ዓላሄይ ዴዲያ ሂንቴ ካታማን ሃይቂዳ ታው አማኔቲዳ ማርካይ፣ አንቲጳሲ፣ ዴዲያ ዎዴካ አማኑዋ አጋባካ።

14 ጊዶሺን፣ ታ ኔና ቦሪያ ጉሳባቲ ዴዎሶና። ሄሲካ ኢስራዔሌ አሳይ ኤቃስ ያርሼቲዳ ካሳ ሚዲ ቱናና ሜላኔ ሳይማቴሳ ናጋራ አሳና ሜላ ባላቃ ታማርሲዳ ባላማ ቲሚርቲያ ኤኪዳ ኢሲ ኢሲ አሳቲ ኔራ ዴዎሶና። 15 ሄሳዳካ፣ ኒቆላዌታ ቲሚርቲያ ታማሪያ አሳቲ ኔራ ዴዎሶና። 16 ሄሳ ጊሾ፣ ኔኒ ኔ ናጋራፔ ሲማ። ሄሲ ሃኖና ኢዲኮ፣ ታ ኔኮ ኤሌሳ ያዳ ሄ አሳታ ታ ዶናፔ ኬያ ማሻን አላና።

17 ገሻ አያናይ ዎሳ ኬሳታስ ጊያባ ሲጻፍው ሃይሲ ዴዲያ አኒካ ሲዎ። ያኒያ አዴስካ ቆሴቲዲ ዴዲያ ማናፊ * ኢማና።

2:7 ሜዴ 2:9፤ ዮ.ቆ 22:2፤ ሂዝ 28:13፤ 31:8 2:8 ኢሳ 44:6፤ 48:12፤
ዮ.ቆ 1:17፤ 22:13 2:11 ዮ.ቆ 20:14፤ 21:8 2:14 ታይ 22:5 * 2:17
ማና፡ ኢስራዔሌ አሳይ ባዞ ቢታን ሃሙቲያ ዎዴ ሳሎፔ ዎሳይ ኤንታው ኢሚዳ ዱማ ካሲ ዎይኮ ኪታንቸ ካሲ።

ቃሲ ኤኪያ ኡራፔ አቲን ሃራ አሲ ኤሮና አራሳ ሱንሳይ ሃፌቲዳ ቦሳ ሹቻ ታ ኢያው ኢማና።

ቲያቲሮና ዎሳ ኬሳስ ኪቴቲዳ ኪታ

18 «ቲያቲሮና ዎሳ ኬሳ ኪታንቹዋስ ሃይሳዳ ያጋዳ ሃፋ።

ታማ ላጮ ዳኒያ አይፌይ ዴዔይሲ፣ ቃሲ ታማን ሴሪዳ ናሴ ቢራታ ዳኒያ ቶሆይ ዴዔይሲ፣ ዎሳ ናዓይ፣ ሃይሳዳ ያኔስ፣
19 ታኒ ኔ አሱዋ፣ ኔ ሲቁዋ፣ ኔ አማኑዋ፣ ኔ አሱዋኔ ኔ ጌንጫ ኤራይስ። ኔኒ ኮይሮ አሴይሳፌ ሃዒ አሳዳ አሴይሳካ ኤራይስ።

20 ጊዶሺን፣ ታ ኔና ቦሪያ ኢሲባይ ዴዔስ፤ ባና ናቤ ጊያ ማጫሲው፣ ኤልዛቤሎ፣ አይኮካ ጋባካ። ሄ ማጫሲያ ኤቃስ ያርሼቲዳ ካሳ ሚዲ ቱናናዳኔ ላይማታናዳ አሳዳ ታ አይሌታ ባሌሳሱ። 21 ኢያ ባ ናጋራፔ ሲማና ሚላ ታ ኢው ዎዴ ኢማስ፣ ሺን ኢያ ሲማናው ኮያቡኩ። 22 ኤንቲ ኢ ባላ አጊያፔ ሲሞና ኢደኮ፣ ታ ኢዮ ኢታ ሃርጌን ዩጋና፤ ኢራ ላይማቴይሳቲካ ኢታ ዋዬ ዋዬታና። 23 ታኒ ኢ ናይታ ዎዳና፤ ቃሲ ዎሳ ኬሳ አባይ ታ አሳ ቆፋኔ አሳ ዎዛና ኤሬይሳ ጊዴይሳ ኤራና። ታ ኢሱዋስ ኢሱዋስ ሂንቴ አሱዋዳ አሱዋዳ ኢማና። 24 ሺን ቲያቲሮናን ዴዒያ ሃራታ፣ ሄ ኢታ ቲሚርቲያ ኤኪቦናይሳታኔ፣ «ፃላሄ ጊታ ፀራ» ጌቴቲያ ሃ ቲሚርቲያ ታማሪቦና ሂንቴና ሃራ ዴዎ ቶሆ ቶሲኪ። 25 ጊዶሺን፣ ታ ያና ጋካናው ሂንቴው ዴዒያባ ሚንሱ ናጊቴ።

26 ያኔይሳሲኔ ወርሴሲ ጋካናው ታው ኪቴቲያ አዴስካ ካዎቴሳታ ሃራና ሚላ ማታ ኢማና።

27 «ኢ ኤንታ ቢራታ ሃምዓን ሃራና፤

ሜቃ ሚሼዳካ ሚንሴሬሳና።»

ሄ ማታይ ታኒ ታ አዋፔ ኤኪዳ ማታ ሜላ። 28 ቃሲ ታ ኢያው ባካላ ያሊንቶ ኢማና። 29 ጌሻ አያናይ ዎሳ ኬሳታስ ጊያባ ሲዒያ ሃይሱ ዴዒያ አኒካ ሲዎ።

3

ሳርዴሳ ዎሳ ኬሳስ ኪቴቲዳ ኪታ

1 «ሳርዴሳ ዎሳ ኬሳ ኪታንቹዋስ ሃይሳዳ ያጋዳ ሃፋ።

ላፑን ዎሳ አያናታኔ ላፑን ያሊንቶታ አይኪዳይሲ ሃይሳዳ ያኔስ፣ ታኒ ኔ አሱዋ ኤራይስ፤ አሲ ኔና ፓፃ ዴዔስ ጊኮካ፣ ኔ ሃይቃዳሳ። 2 ባርካ! ጉሳ አቲዳባኔ ሃይቃናው ማቲዳባ ሚንሳ። ኔ

2:17 ኬሳ 16:14 2:20 1ካዎ 16:31፤ 2ካዎ 9:22 2:23 ማዝ 7:9፤ ኤር 17:10፤ ማዝ 62:12 2:26 ማዝ 2:8-9

አሶይ ያሳ ሲንሳን ፖሎ ጊዶናይሳ ዴማስ። ³ ሂዛ፥ ኔ ኤኪዳባኔ ሲዲዳባ አኪካ፤ ናጋ፤ ኔ ናጋራፔ ሲማ። ኔኒ ባርኮና ኢቢኮ ታ ካይሶዳ ያና፤ ታ አይ ዎዴ ያኔኮ ኔ ኤራካ።

⁴ ሺን ባንታ ማዑዋ ቂታዮና ጉሳ አሳቲ ሳርዴሳን ዴዎሶና። ኤንታው ቤሲያባ ጊዲያ ጊሾ ቦላ ማዎ ማዲዲ ታራ ሃሙታና።

⁵ ያኒያ አኒካ ኤንታይሳዳ ቦላ ማዎ ማዳና። ታኒ ኢያ ሱንሳ ዴዎ ማፃፋፔ ቁቹኬ። ታኒ ታ አዋ ሲንሳኒኔ ኢያ ኪታንቾታ ሲንሳን ኢ ታባ ጊዴይሳ ማርካታና። ⁶ ጌሻ አያናይ ዎሳ ኬሳታስ ጊያባ ሲዲያ ሃይሴ ዴዲያ አኒካ ሲዎ።

ፊላዴልፊያ ዎሳ ኬሳስ ኪቴቲዳ ኪታ

⁷ «ፊላዴልፊያ ዎሳ ኬሳ ኪታንቾዋስ ሃይሳዳ ያጋዳ ዓፋ።

ጌሻይኔ ቱማንቾይ፥ ዳዊቱ ቁልፒያ ባ ኩሼን አይኪዳይሲ፥ ሃይሳዳ ያኒስ። ኢ ጎርዲን አኒካ ዶያናው ዳንዳዔና፤ ቃሲ ኢ ዶይን አኒካ ጎርዳናው ዳንዳዔና። ⁸ ታኒ ኔ አሱዋ ኤራስ፤ ሄኮ ታ ኔ ሲንሳን አኒካ ጎርዳናው ዳንዳዎና ዶያ ፔንጌ ዎሳስ። ኔ ዎልቃይ ጉሳ ጊዲኮካ፥ ታ ቃላ ናጋዳሳ፤ ታና ካዳባካ።

⁹ አይሁዴ ጊዶናሺን ባንታና አይሁዴ ጊያ ዎርዶታኔ ዓላሄ ባጋታ ኔኮ ኤሃናኔ ኔ ሲንሳን ጉልባቲሳና። ታ ኔና ዶሴይሳ ኤንታና ኤራሳና። ¹⁰ ኔኒ፥ <ጌንጫ> ጋዳ ታ ኪቲዳ ኪታ ናጊዳ ጊሾ ኩሜሳ አላሚያ ፓጫናው ያ ዋዬ ዎዲያፔ ታኒ ኔና ናጋና።

¹¹ ታኒ ኤሌሳዳ ያና፤ አኒካ ኔ ካላቻ ኤኮና ሜላ ኔው ዴዲያባ ሚንሳዳ አይካ። ¹² ያኒዳይሳ ታ ዎሳ ኬሳን ቱሱ አላና፤ ኢ ያን ሜሪናው ዳና። ታኒ ታ ዎሳ ሱንሳኔ ታ ዎሳ ካታማ ሱንሳ ኢያ ቦላ ዓፋና፤ ኢያካ ታ ዎሳ ማታፔ ዎዲያ ኦራሳ ዩሩሳላሜ። ቃሲ ታ ታ ኦራሳ ሱንሳካ ኢ ቦላ ዓፋና። ¹³ ጌሻ አያናይ ዎሳ ኬሳታስ ጊያባ ሲዲያ ሃይሴ ዴዲያ አኒካ ሲዎ።

ሎዶቂያ ዎሳ ኬሳስ ኪቴቲዳ ኪታ

¹⁴ «ሎዶቂያ ዎሳ ኬሳ ኪታንቾዋስ ሃይሳዳ ያጋዳ ዓፋ።

<አሚንዲ> ጊዲዳ አማኔቲዳ ቱማ ማርካይ፥ ዎሳ ሜዴቴላ ሃራይሲ ሃይሳዳ ያኒስ። ¹⁵ ታኒ ኔ አሱዋ ኡባ ኤራይስ፤ ኔኒ ኢርፃ ዎይኮ ሚሻ ጊዳካ፤ ኔኒ ናምዔሬ ኢሱዋ ጊዲኮ ሎዎ! ¹⁶ ኔኒ ኢርፃ ዎይኮ ሚሻ ጊዶናሺን ቦልዎ ጊዲያ ጊሾ ታ ኔና ታ ዶናፔ ጩታና ሃናይስ። ¹⁷ ሂዛ፥ ኔኒ፥ <ታኒ ዱሬ፥ ሻሎራ ዴዳይስ፥ ታው አይቢባይካ ፓጩቤና> ያጋሳ። ሺን ኔኒ ሜቶታንቾ፥ ማንቆ፥ ቆቄኔ ካሎቲዳ አሲ ጊዴይሳ ኤራካ።

3:3 ማቶ 24:43 3:5 ኬሳ 32:32 3:7 ኢሳ 22:22፤ ኢዮ 12:14 3:9 ኢሳ 49:23፤ 60:14፤ ኢሳ 43:4 3:12 ዮቆ 21:2፤ ኢሳ 62:2፤ 65:15
3:14 ሌሚ 8:22

18 ሄሳ ጊሾ፥ ኔ ዱሬታናው ታማን ጌዩዳ ዎርቃ፥ ኔ ዩላ ካሉዋ ካማናው ቦላ ማዖኔ ሎይሳ ያላናው ማዲያ አይፌ ዳሌ ታፔ ሻማና ሜላ ኔና ዞራይስ።

19 ታ ዶሴይሳ ሴራይሲኔ ሃንቃይስ፤ ሂዛ ሚና፤ ኔ ናጋራፔ ሲማ። 20 ሄኮ፥ ታ ካራን ኤቃዳ ያጋይስ። አኒካ ታ ያሳ ሲዲዲ፥ ዉላ ዶዩኮ፥ ኢያኮ ጌላና፤ ኢያራ ኢሲፌ ካሲ ማና፤ ኢካ ታራ ኢሲፌ ማና።

21 ታ ያናዳ ታ አዋራ ኢያ አራታን ኡቲዳይሳዳ ያኒዳይ ታራ ታ አራታን ኡታና ሜላ ማታ ኢማና። 22 ጌሻ አያናይ ዎሳ ኬላታስ ጊያባ ሲዲያ ሃይሲ ዴዔይ አኒካ ሲዖ» ያጊስ።

4

ሳሎን ዴዲያ ጎይኖ ዎጋ

1 ሄሳፌ ጉዬ፥ ታኒ ሳሎ ያሊያ ዎዴ ዶዩቲዳ ፔንጌ ቤዓስ። ቃሲ ታ ካሴ ሲዲዳ ሞይዜ ጊርሳ ሜላይ ታኮ፥ «ሃ ኬያ፤ ሃይሳፌ ጉዬ፥ ሃናናው ዴዲያባ ታ ኔና ቤሳና» ያጊስ። 2 ሄ ዎዴ ታ አያናን ሃራታዳ ዴዳይስ። ሄኮ፥ ሳሉዋን አራታ ቦላ ኢሶይ ኡቲዳይሳ ቤዓስ። 3 ሄ ኡቲዳይሳ ማላይ ኢያስጸዴኔ ሳርዲዮና ጊያ አልዎ ሹቸ ሜላ። ኢያ አራታ ዩሹዋን አልዎ ሹቸ ዳኒያ ዙላይ ዴዔስ። 4 ሄ አራታ ዩሹዋን ላታማኔ አይዱ አራታቲ ዴዎሶና፤ ኤንታ ቦላ ቦላ ማዖ ማዲዲ፥ ሁዔን ዎርቃ ካላቻ ዎሲዳ ላታማኔ አይዱ ጨማቲ ኡቲዶሶና። 5 አራታፔ ዎልዓንሲ፥ ጉንሲኔ ዴሾይ ኬዬስ። አራታ ሲንሳን ላፑን ፖዲያ ዎምፔቲ ዴዎሶና፤ ኤንቲ ላፑን ዎሳ አያናታ። 6 አራታ ሲንሳን ቢሪሴ ዳኒያ ጸሊያ ቡርጩኮ አባይ ዴዔስ።

ሲንሳራኔ ጉዬራ አይፌይ ዴዲያ አይዱ ዴዎራ ዴዲያ ሜዴቴላቲ አራታ ዩሹዋኒኔ አራታ ጊዶን ዴዎሶና። 7 ኮይሮ ሜዴቴላ ሜዶይ ጋሞ ዳኔስ፤ ናምዓንሶይ ቦሪ ዳኔስ፤ ሄቫንሶይ አሴ ዳኔስ፤ ቃሲ አይዳንሶይ ፒራዲያ አርጋንሲ ዳኔስ። 8 አይዱ ሜዴቴላታ ኡባስ ኡሱፑን ቁፌይ ዴዔስ፤ ኤንታ አሳቴላ ኡባይ አይፌን ኩሚስ። ኤንቲ ቃማኔ ጋላስ ቃንዎና፥

«ጌሻው፥ ጌሻው፥ ጌሻው፥
ጎዳው፥ ኡባፌ ዎልቃማ ዎሳው፥

ካሴካ፥ ሃዲካ ዴዔይሶ፥ ሲንሳፌ ያናይሶ»

3:19 ሎጊ 3:12፤ ኢብ 12:6 4:2 ሂዛ 1:26-28፤ 10:1 4:5 ኬላ 19:16፤
ዮቆ 1:4፤ ዮቆ 8:5፤ 11:19፤ 16:18፤ ሂዛ 1:13፤ ዛነ 4:2 4:6 ሂዛ 1:22
4:6 ሂዛ 1:5-10፤ 10:14 4:8 ሂዛ 1:18፤ 10:12፤ ኢሳ 6:2

ያጎሶና። 9 ሄ ሜዴቴላቲ አራታን ኡቲዳይሳሲኔ ሜሪናው ዴዔይሳስ ሳባ፤ ቦንቾኔ ጋላታ ኢሚዳ ዎዴ 10 ላታማኔ አይዱ ጪማቲ አራታን ኡቲዳይሳኔ ሜሪናው ዴዔይሳ ሲንሳን ጉፋኒዲ ጎይኒዶሶና፤ ባንታ ካላቻ አራታ ሲንሳን ዎሲዲ።

11 «ኑ ጎዳው፤ ኑ ያሳው።

ኔኒ ቦንቾ፤ ሳባኔ ዎሊቃ ኤካናው ቤሳሳ።

ኔኒ ኡባ ሜዳዳሳ፤

ኡባባይ ኔ ሼኒያዳ ሃኒስ፤ ሜዴቴስ»

ያጊዶሶና።

5

ዶርሳይ ፃላ ማፃፋ ዶዩስ

1 ሄሳፌ ጉዬ፤ አራታ ቦላ ኡቲዳይሳ ኡሻቻ ኩሼን ጊዶራኔ ካሬራ ፃፌቲዳ ላፑን ማታሜን ጎርዴቲዳ ፃላ ማፃፋ ቤዓስ። 2 ኢሲ ሚኖ ኪታንቾይ ባ ቃላ ዶቁ አሲዲ፤ «ማታሚያ ቢላናውኔ ማፃፋ ዶያናው ቤሴይ ኦኔ?» ያጊዲ አዎጂሺን ቤዓስ። 3 ሺን ሳሎን ጊዲን ሳዓን ዎይኮ ሳዓፕ ጋርሳን ጊዲን ሄ ፃላ ማፃፋ ቢላናውኔ ጊዱዎ ቤዓናው ዳንዳዔይ ኦኒካ ቤንቲቤና። 4 ፃላ ማፃፋ ቢላናውኔ ኢያ ጊዱዎ ቤዓናው ቤሲያ አሲ ዳዩዳ ጊሾ ታ ዳር ዩካስ። 5 ያቲን፤ ጪማታፕ ኢሶይ ታኮ፤ «ዩኮፋ! ሄኮ፤ ዩሁዳ ዜሬሲ ጊዲያ ጋዎይ፤ ዳዊቴ ሼሻይ፤ ላፑን ማታሜታ ቢላናውኔ ማፃፋ ዶያናው ዳንዳዒስ» ያጊስ።

6 ሄሳፌ ጉዬ፤ ሹኪቲዳ ዶርሳይ አራታስ፤ አይዱ ዴዎን ዴዒያ ሜዴቴላታሲኔ ጪማታስ ጊዶን፤ ኤቂዳይሳ ቤዓስ። ኢያው ላፑን ካጩቲኔ ላፑን አይፌቲ ዴዎሶና። ሄሳቲ ሳዓ ኡባ ኪቴቲዳ ያሳ ላፑን አያናታ። 7 ሄ ዶርሳይ ቢዲ፤ አራታ ቦላ ኡቲዳይሳ ኡሻቻ ኩሼፕ ፃላ ማፃፋ ኤኪስ። 8 ኢ ሄ ፃላ ማፃፋ ኤኪዳ ዎዴ ዴዎን ዴዒያ አይዱ ሜዴቴላቲኔ ላታማኔ አይዱ ጪማቲ ዶርሳ ሲንሳን ኩንዲዶሶና፤ ኤንቲ ኢሶይ ኢሶይ ዲሲኔ ጌሻታ ዎሳ ጊዲዳ ኢፃኔይ ኩሚዳ ዎርቃ ሻቴ አይኪዶሶና። 9 ኤንቲ፤ «ፃላ ማፃፋ ኤካናው፤

ማታሚያ ቢላናው ኔው ቤሴስ።

አይስ ጊኮ፤ ኔኒ ሹኪታዳሳ፤

ዜሬሲ ኡባፌ፤ ዱማ ዱማ ዶናፕ፤

ያራታፕኔ ካዎቴላታ ኡባፌ

ኔ ሱላን ያሳስ ዎዛዳሳ።

5:1 ሂዝ 2:9 5:5 ሜዴ 49:9፤ ኢሳ 11:1 5:6 ኢሳ 53:7፤ ዛነ 4:10
5:8 ማዝ 141:2 5:9 ማዝ 33:3፤ 98:1፤ ኢሳ 42:10

10 ኤንቲ ኢያ ሦላ አዋስ አሳና ሜላ
 ኤንታና ካሂኔ ካዎቴሲ አሳዳሳ።
 ኤንቲካ ቢታ ኡባ ሃራና»
 ያጊዲ አራሳ ማዝሙራ ዩዲዶሶና።

11 ታ ቢዲያ ዎዴ ሙኩሉ ቶሆ ሙኩሉኔ ታሙ ሙኩሉ ቶሆ
 ታሙ ሙኩሉ ጊዲያ ኪታንቾታ ጊርሳ ሲዓስ። ኤንቲካ አራታ፥
 አይዱ ዴዎን ዴዲያ ሜዴቴሳታኔ፥ ጨማታ ዩሹዋን ኤቂዶሶና።

12 ሄ ኪታንቾቲ ዶቁ ጊዳ ቃላን፥
 «ሹኪቲዳ ዶርሳይ ዎልቃ፥ ዱሬቴሲ፥
 ጨንጫቴሲኔ ሚናቴሲ፥
 ቦንቾ፥ ሳባኔ ጋላታ ኤካናው ቤሴስ»
 ያጊዶሶና።

13 ሄሳፌ ጉዩ፥ ሳዓን፥ ሳሎን፥ ሳዓፔ ጋርሳኔ አባ ጊዶን
 ዴዲያ ሜዴቴሲ ኡባይ፥
 «አራታ ቦላ ኡቲዳይሳሲኔ ዶርሳስ፥
 ጋላታይ፥ ቦንቾይ፥ ሳባይኔ ዎልቃይ
 ሜሪ ሜሪናው ጊዶ»
 ያጊዲ ዩዲሺን ሲዓስ።

14 አይዱ ዴዎን ዴዲያ ሜዴቴሳቲ፥ «አሚንዲ» ያጊዶሶና፤
 ቃሲ ጨማቲ ጉፋኒዲ ጎይኒዶሶና።

6

ማታሚያ ዶዩቴሳ

1 ዶርሳይ ላፑን ማታሚያፔ ኢሱዋ ዶዩሺን ቤዓስ። ቃሲ አይዱ
 ዴዎን ዴዲያ ሜዴቴሳታፔ ኢሶይ፥ ዳዳ ዴሾ ጊርሳን፥ «ሃያ!»
 ያጊሺን ሲዓስ። 2 ሄኮ ቦሳ ፓራ ቤዓስ። ሄ ፓራ ቶጊዳሲ ዶንጌ
 አይኪስ፤ ኢያ ሁዔን ካላቺ ዴዔስ። ኢካ ዶኒሼ ዎናናው ኪዩስ።

3 ቃሲ ዶርሳይ ናምዓንሶ ማታሚያ ዶዩዳ ዎዴ ዴዎን ዴዲያ
 ናምዓንሶ ሜዴቴሳይ፥ «ሃያ!» ያጊሺን ሲዓስ። 4 ቃሲ ሃራ ሲሃ
 ዞዎ ፓሪ ኪዩስ። ሄ ፓራ ቶጊዳይሳስ ሳዓፔ ሳሮ ዳይሳና ሜላኔ
 አሳይ ዎሊ ዉርሳና ሜላ ማቲኔ ጊታ ማሺ ኢሜቲስ።

5 ዶርሳይ ሄቫንሶ ማታሚያ ዶዩዳ ዎዴ ዴዎን ዴዲያ ሄቫንሶ
 ሜዴቴሳይ፥ «ሃያ!» ያጊሺን ሲዓስ። ሄኮ ካሬሳ ፓራ ቤዓስ፤ ኢካ
 ባ ኩሼን ሚዛኔ አይኪስ። 6 አይዱ ዴዎን ዴዲያ ሜዴቴሳታ
 ጊዶፌ፥ «ኢሲ ጋላሳ አሶስ ዳሞዜ፥ ባጋ ኪሎ ጊስቲ፤ ቃሲ ኢሲ

5:10 ኪሳ 19:6፤ ዮቆ 1:6 5:11 ዳኔ 7:10 6:2 ዛካ 1:7 6:4 ዛካ
 1:7 6:5 ዛካ 6:2

ጋላሳ አሶስ ዳሞዜ፥ ኢሲ ኪሎኔ ባጋ ባንጋ ጊዶ፥ ሺን ዛይቲያኔ ዎይኒያ ቆሆፓ» ያጊሺን ሲዓስ።

7 ዶርሳይ አይዳንሶ ማታሚያ ዶዶዳ ዎዴ አይዳንሶ ዴዎን ዴዒያ ሜዴቴሳይ፥ «ሃያ!» ያጊሺን ሲዓስ። 8 ሄኮ ዋንጮ ፓራ ቤዓስ፥ ሄ ፓራ ቶጊዳይሳ ሱንሳይ ሃይቆ፤ ኢያ ጌዶ ሲዎሌይ ካሌስ። ኤንታው አላሚፔ አይዳንሶ ኩሺያ አላን፥ ኮሻን፥ ጋዶኒኔ ዶዳን ዎዲሳና ሜላ ማቲ ኢሜቲስ።

9 ዶርሳይ ኢቻሻንሶ ማታሚያ ዶዶዳ ዎዴ ኤንቲ ዎሳ ቃላ አዲዳ ጊሾኔ ባንታ ማርካቴሳን አማኔቲዳ ጊሾ ሹኪቲዳ አሳ ሽምፓታ ያርሾ ቤሳፌ ጋርሳን ቤዓስ። 10 ኤንቲ ባንታ ቃላ ዶቁ አሲዲ፥ «ኡባ ሃሪያ ጎዳው፥ ጊሻው፥ ቱማንቹዋው፥ ሳዓን ዴዒያ አሳ ቦላ ኔ ፐርዳናይኔ ኑ ሱሳ ጊሾ ሃሎ ኬያናይ አወዴ?» ያጊዶሶና።

11 ኤንታ ኢሱዋስ ኢሱዋስ ቦላ ማዎይ ኢሜቲስ። ኤንታይሳዳ ሃኒዲ ሃይቃናው ቤሲያ ኤንታ ላጌታ ታይቦይ ኩማና ጋካናው ጉሳ ዎዴ ሽምፓና ሜላ ኤንታው አዴቲስ።

12 ዶርሳይ ኡሱፑንሳ ማታሚያ ዶዶዳ ዎዴ ታ ቤዓስ፤ ዎልቃማ ቢታ ቃዎይ ሃኒስ። አዋ አይፌይ ካሬዒዲ ካሌ ዳኒስ። አጌናይካ ዞዒዲ ሱሱ ዳኒስ። 13 ዎልቃማ ጫርኮይ ጫርኪዲ ባላሴ ሚሳ ቃወዒ አይፊያ ቆቆፌይሳዳ ሳሎዋ ያለንቶቲ ሳዓን ቆቆፌቲዶሶና። 14 ሳሎይ ዓሳ ማፃፋዳ ፃፃቲዲ አዲስ፤ ዙማይኔ አባን ቴቁቲዳ ቢታቲ ባንታ ቤሳፌ ዳዶዶሶና። 15 ቢታ ካዎቲ፥ ዴሪያ ሃሬይሳቲ፥ አላ ካሌሴይሳቲ፥ ዱሬሬ፥ ዎልቃማቲ፥ አይሌቲኔ፥ ዎማኖቲ ጎንጎሎኒኔ ዴሪያ ቦላ ዴዒያ ዛላ ሆምዎን ቆሴቲዶሶና። 16 ኤንቲካ ዙማኮኔ ዛላኮ፥ «ኑ ቦላ ዎዲቴ፤ ኑና ቆሲቴ፤ አራታን ኡቲዳይሳ አይፊያፔኔ ዶርሳ ሃንቁዋፌ ኑና ጌንሲቴ። 17 ሂዛ፥ ጊታ ሃንቆ ጋላሳይ ጋኪስ፤ አኔ ዳንዳዒዲ ኤቃናይ?» ያጊዶሶና።

7

144፥000 አሳታ ቦላ ማታሚይ ዎሴቲስ

1 ሄሳፌ ጉዬ፥ አይዱ ኪታንቾቲ አይዱ ሳዓ ጋዓን ኤቁዳይሳታ ቤዓስ። ሄ ኪታንቾቲ ሳዓ ቦላ ዎይኮ አባ ቦላ ዎይኮ አይ ሚሳ ቦላ ጫርኮይ አይዱ ሳዓ ጋዓፔ ጫርኮና ሜላ ቴቁዶሶና። 2 ቃሲ ዴዎ ዎሳ ማታሚያ አይኪዳ ሃራ ኪታንቾይ ዶሎሃ ባጋፌ ኬዬይሳ

6:8 ሂዝ 14:21 6:12 ዮቆ 11:13፤ 16:18፤ ኢሳ 13:10፤ ኤር 2:10 6:13 ኢሳ 34:4 6:14 ዮቆ 16:20 6:15 ኢሳ 2:19 6:16 ሆሴ 10:8፤ ሉቃ 23:30 6:17 ኤር 2:11፤ ሚል 3:2 7:1 ኤር 49:36፤ ዳኔ 7:2፤ ዛክ 6:5

ቤዓስ። ሄ ኪታንቾይ ባ ቃላ ዶቄ አሲዲ፥ ሳዓኔ አባ ቆሃናው ዎልቂ ኢሜቲዳ አይዱ ኪታንቾታ፥ ³ ያጊዲ፥ «ኑኒ ያሳ አይሌታ ሶምዎን ማታሚያ ዎሳና ጋካናው ቢታ ዎይኮ አባ ዎይኮ ሚሳ ቆሆፒቴ» ያጊስ።

⁴ ያቲን፥ ታኒ ያሳ ማታሚይ ሶምዎን ዎሴቲዳይሳታ ፓይዱዋ ሲዓስ። ኢስሪዔሌ ማይዛታ ኡባፌ ዔታኔ አይታማኔ አይዱ ሙኩሉ አሳስ ሶምዎን ማታሚ ዎሲስ።

⁵ ዩሁዳ ዜሬሳፌ ታማኔ ናምዑ ሙኩሉ፥

ሮቤላ ዜሬሳፌ ታማኔ ናምዑ ሙኩሉ፥

ጋዴ ዜሬሳፌ ታማኔ ናምዑ ሙኩሉ፥

⁶ አሴሪ ዜሬሳፌ ታማኔ ናምዑ ሙኩሉ፥

ኒፍታሌሜ ዜሬሳፌ ታማኔ ናምዑ ሙኩሉ፥

ሚናሴ ዜሬሳፌ ታማኔ ናምዑ ሙኩሉ፥

⁷ ሲሞና ዜሬሳፌ ታማኔ ናምዑ ሙኩሉ፤

ሌዌ ዜሬሳፌ ታማኔ ናምዑ ሙኩሉ፥

ዩሳኩሪ ዜሬሳፌ ታማኔ ናምዑ ሙኩሉ፥

⁸ ዛቢሎኔ ዜሬሳፌ ታማኔ ናምዑ ሙኩሉ፥

ዮሴፋ ዜሬሳፌ ታማኔ ናምዑ ሙኩሉ፥

ቢኒያሜ ዜሬሳፌ ታማኔ ናምዑ ሙኩሉ፥

አሳ ሶምዎን ማታሚ ዎሲስ።

ቦሳ ማዎ ማጊዳ ዳሮ አሳታ

⁹ ሄሳፌ ጉዩ፥ ዜሬሲ ኡባፌ፥ ካዎቴሳ ኡባፌ፥ ያራ ኡባፌኔ ዱማ ዱማ ዶናፔ ዛዊ ባይና ዳሮ አሳ ቤዓስ። ሄ አሳይ ቦሳ ማዎ ማጊዳ፥ ዛምባ ሃይሲ ባንታ ኩሼን አይኪዲ፥ አራታ ሲንሳኒኔ ዶርሳ ሲንሳን ኤቂዶሶና። ¹⁰ ኤንቲ ባንታ ቃላ ዶቄ አሲዲ፥ «አቶቴሳይ አራታን ኡቲዳ ኑ ያሳፌኔ ዶርሳፌ ዩስ» ያጊዶሶና።

¹¹ ኪታንቾቲ ኡባይ፥ አራታ፥ ጨማታኔ አይዱ ሜዴቴሳታ ዩሹዋን ኤቂዶሶና። ኤንቲ አራታ ሲንሳን ጉፋኒዲ ያሳ ጎይኒዶሶና።

¹² «አሚንዒ!»

አንጆይ፥ ቦንቾይ፥ ጨንጫቴሳይ፥ ጋላታይ፥ ሳባይ

ዎልቃይ፥ ሚኖቴሳይ ሜሪ ሜሪናው

ኑ ያሳስ ጊዶ።

አሚንዒ!»

ያጊዶሶና።

¹³ ጨማታፔ ኢሶይ ታኮ፥ «ሃ ቦሳ ማዎ ማጊዳ አሳቲ አናንቴ? ኤንቲ አውፔ ዩዶና?» ያጊዲ አይቺስ።

¹⁴ ታኒ ዛራዳ፥ «ጎዳው፥ ኔ ኤራሳ» ያጋስ።

ኢካ ታኮ፡ «ሃይሳቲ ዳሮ ዋዬ ዋዬ ዳዲ አዲዳይሳታ። ኤንቲ ባንታ ማዑዋ ዶርሳ ሱሳን ሜጪዲ ጌሺዶሶና። 15 ሄሳ ጊሾ፡ ኤንቲ ያሳ አራታ ሲንሳን ጊዲዲ

ቃማኔ ጋላስ ኢያ ኬሳን አሶሶና።
ቃሲ አራታ ቦላ ኡቲዳይሲ ኤንታው ኩያ ጊዳና።
16 ሂዛፕ ጉዬ፡ ኤንቲ ኮሻቶኮና፡ ሳሞቶኮና።

አዊ ዎይኮ ሚሺ ኤንታ ሜና።
17 አራታ ጊዶን ኡቲዳ ዶርሳይ ኤንታ ሄማና።
ዴዎ ፑልቶ ሃሳኮ ኤንታ ካሌሳና።
ያሳይ ኤንታ አይፊያፕ አፉሳ ኡባ ቁቻና»
ያጊስ።

8

ላፑንሳ ማታሜይ ዶዬቲስ

1 ዶርሳይ ላፑንሳ ማታሚያ ዶዬዳ ዎዴ ባጋ ሳቴ ጊዴይሳ ሜላ ሳሎይ ሲዲ ጊስ።

2 ሄሳፌ ጉዬ፡ ታኒ ላፑን ሞይዜቲ ኢሜቲዳ ላፑን ኪታንቾታ ያሳ ሲንሳን ኤቂዳይሳታ ቤዓስ።

3 ኢፃኔ ጩዩሲያ ዎርቃ ሻቴ አይኪዳ ሃራ ኪታንቾይ ዩዲ፡ ያርሾ ቤሳ ማታን ኤቂስ። ኢ አራታ ሲንሳን ዴዲያ ዎርቃ ያርሾ ቤሳ ቦላ ጌሻታ ኡባ ዎሳራ ጉጂዲ ያርሻና ሜላ ኢያው ዳሮ ኢፃኔይ ኢሜቲስ። 4 ኢፃኔያ ጩያይ ጌሻታ ዎሳራ ኢሲፌ ኪታንቾዋ ኩሼፕ ፑዴ ያሳኮ ኬዬስ። 5 ሄሳፌ ጉዬ፡ ኪታንቾይ ኢፃኔ ጩዩሲያ ሻቲያ ኤኪዲ፡ ኢያን ያርሾ ቤሳፌ ቦንቆ ታማ ኩንሲዲ ሳዓ ዱጌ ሆሊስ። ያቲን ዴሾይ፡ ዎልዓንሲ፡ ጊርሲኔ ቢታ ቃዎይ ሃኒስ።

ላፑን ሞይዜታ

6 ሄሳፌ ጉዬ፡ ላፑን ኪታንቾቲ ባንታ ሞይዚያ ፑናናው ጊጌቲዶሶና።

7 ኮይሮ ኪታንቾይ ባ ሞይዚያ ፑኒያ ዎዴ ሻቺኔ ሱሳራ ዋላኬቲዳ ታሚ ሳሎፕ ቡኪስ። ሳዓፕ ሲኮይ ፀጌቲስ፤ ሚሳፌ ሲኮይ ፀጌቲስ፤ ጪልዎ ማታ ኡባይ ፀጌቲስ።

8 ናምዓንሶ ኪታንቾይ ባ ሞይዚያ ፑኒያ ዎዴ ዎልቃማ ዴሬ ዳኒያባይ ታማን ኤዪሼ አባን ዩጌቲስ። ያቲን፡ አባፌ ሲኮይ

7:14 ዳኔ 12:1፤ ማቶ 24:21፤ ማር 13:19 7:16 ኢሳ 49:10 7:17 ማዝ 23:1፤ ሂዝ 34:23፤ ማዝ 23:2፤ ኢሳ 49:10፤ ኢሳ 25:8 8:5 ሌዌ 16:12፤ ሂዝ 10:2፤ ኬሳ 19:16፤ ዮቆ 11:19፤ 16:18 8:7 ኬሳ 9:23-25፤ ሂዝ 38:22

ሱሱ ጊዲስ። 9 አባን ዴዎን ዴዲያ ሜዴቴሳፌ ሲኮይ ሃይቂስ፤ ማርካቤታቴ ሲኮይ ዳይስ።

10 ሄቫንሶ ኪታንቾይ ባ ሞይዚያ ፑኒዳ ዎዴ ምጥጥ ኤዲያ ዎልቃማ ያሊንቶይ ቫፋቴ ሲኮቶ ቦላኔ ፑልቶታ ቦላ ሳሎፕ ዎዲስ። 11 ሄ ያሊንቶቶ ሱንሳይ ጫሞ ጌቴቴስ። ሃሳፌ ሲኮቶ ጫሚሲስ፤ ሃሳይ ጫሚዳ ጊሾ ዳሮ አሳይ ሄ ሃሳ ኡዬዲ ሃይቂዶሶና።

12 አይዳንሶ ኪታንቾይ ባ ሞይዚያ ፑኒስ። አሞፕ፣ አጌናፕኔ ያሊንቶታቴ ሲኮቶ ዴቺስ፤ ኤንታ ፖዑሞፕ ሲኮይ ዳሚስ። ጋላፕ ሲኮይ ዳሚስ።

13 ኢሲ አርጋንሲ ሳሎ ዶቁ ጊዲ፣ ፒራዲሺን ቤዓስ። ሄ አርጋንሳይ ባ ቃላ ዶቁ አሲዲ፣ «አቲዳ ሄኹ ኪታንቾቲ ባንታ ሞይዚያ ፑናናው ዴዲያ ጊሾ ሳዓን ዴዲያ አሳ አዩ! አዩ! አዩ!» ያጊሺን ሲዓስ።

9

1 ሄሳፌ ጉዩ፣ ኢቻቫንሶ ኪታንቾይ ባ ሞይዚያ ፑኒን ሳሎፕ ዱጌ ሳዓ ኩንዲዳ ያሊንቶ ቤዓስ። ሄ ያሊንቶቶስ ዎልቃማ አላ ቁልፕይ ኢሜቲስ። 2 ያሊንቶይ አላ ዶዩዳ ዎዴ ዳልጋ ጮጮፕ ኪያ ጩያ ሜላ ጩያይ ሄ አሳፌ ኪዩስ። ሄ አሳፌ ኪዩዳ ጩያን አሞይኔ ሳሎይ ዳሚዶሶና።

3 ሄ ጩያፕ ቦሌይ ኪዩዲ ሳዓን ዎዲስ። ሳዓን ዴዲያ ኮርኔታስ ዴዲያ ዎልቃ ሜላ ዎልቂ ቦሌታስ ኢሜቲስ። 4 ያሳ ማታሜይ ሶምዎን ባይና አሳ ዓላፕ አቲን ሳዓን ዴዲያ ማታ ዎይኮ ሚሲ ዎይኮ አይ ጨልዎባ ጊዲን ቆሆና ሜላ ቦሌታስ አዴቲስ። 5 ቦሌቲ አሳ ኢቻቫ አጌና ጋካናው ፓዓ ካዓና ሜላ ማቲ ኢሜቲስፕ አቲን አሳ ዎዳና ሜላ ጊዴና። ኮርኔይ አሴ ዱኪን ዛሜይሳ ሜላ ቦሌይ ዱኪዲ ዛሚሴስ። 6 ሄ ጋላሳታን አሳይ ሃይቆ ኮያና፣ ሺን ዴሜና። ኤንቲ ሃይቃናው አሞታና፣ ሺን ሃይቆይ ኤንታፌ ሃካና።

7 ቦሌይ አላስ ጊጊ ኡቲዳ ፓራ ዳኔስ። ቦሊያ ሁዔን ዎርቃ ካላቺ ዴዔስ፤ ኤንታ ሶምዎይካ አሳ ሶምዎ ዳኔስ። 8 ኢያ ቢናናይ ማጫሳ ቢናና ሜላ አዱሴ። ኤንታ አቻይካ ጋሞ አቺ ዳኔስ።

9 ኤንታው ቲራ ቦላ ዎሲያ ቢራታ ፀናሬይ ዴዔስ፤ ኤንታ ቁሬያ ጊርሳይ አሌታናው ጋላቢያ ፓራኔ ፓራ ጋሬ ጊርሳ ሜላ።

8:10 ኢሳ 14:12 8:11 ኤር 9:15 8:12 ኢሳ 13:10፤ ሂዝ 32:7፤ ኢዩ 2:10 9:2 ሜዴ 19:28 9:3 ኬሳ 10:12 9:4 ሂዝ 9:4 9:6 ኢዩ 3:21፤ ኤር 8:3 9:7 ኢዩ 2:4 9:8 ኢዩ 1:6

10 ኤንታው ኮርኔ ጎይና ዳኒያ ጎይኒኔ ዱኪያ ዩቪ ዴዔስ። ሄ ጎይናን ኢቻቸ አጌና አሳ ቆሃና ሜላ ማቲ ኢሜቲስ። 11 ኤንታና ሃሪያ ካዎይ ዴዔስ፤ ሄ ካዎይ አላ ኪታንቸዎ። ኢያ ሱንሳይ ኢብራይስጢ ዶናን አብዶና፤ ቃሲ ጊሪኪ ዶናን አጸሊዮና ጌቴቴስ። ኢያ ሱንሳ ቢርሼሳይ «ዳይሴይሳ» ጉሱ።

12 ኮይሮ አዩይ አዲስ፤ ሄኮ፣ ቡሮ ሃራ ናምዑ አዩቲ ኤሶን ሃናና።

13 ኡሱፑንሳ ኪታንቸይ ባ ሞይዚያ ፑኒስ። ያሳ ሲንሳን ኤቂዳ፣ ዎርቃ ያርሾ ቤሳን ዴዒያ አይዱ ካጮታፑ ኢሲ ጊርሲ ሲዓስ።

14 ሄ ጊርሳይ ሞይዜ አይኪዳ ኡሱፑንሳ ኪታንቸዎኮ፣ «ኤፊራዒሴ ጊያ ጊታ ሻፋን ቃሼቲዳ አይዱ ኪታንቸታ ቢርሻ» ያጊስ።

15 ቢታ ቦላ ዴዒያ አሳፕ ሲኩዎ ዎዳና ሜላ ሄ ሳቲያስ፣ ሄ ጋላሳስ፣ ሄ አጌናሲኔ ሄ ላይሳስ ጊጊዲ ኡቲዳ አይዱ ኪታንቸቲ ቢርሼቲዶሶና። 16 አላ ፓራ ቶጊያ አላንቸታ ፓይዶይ ዳሮ ዌቱ ሚሎኔ ጊዴይሳ ሲዓስ።

17 ቃሲ ታ ቆንጮሳን ፓራታኔ ሄ ፓራታ ቶጊዳ አሳ ቤዓስ። ሄ አሳይ ቲራን ዎሲያ ቢራታ ፀፋሬይ ታማ ቦንቆ ሜላ ዞዎ፣ ያኪንቱ ሜላ፣ ካሬሳ ካሎሴ ሜላኔ ዲኔ ሜላ ጨሊሎ። ፓራታ ሁዔይ ጋሞ ሁዔ ሜላ፤ ኤንታ ዶናፕ ታሚ፣ ጩዩኔ ዲኔይ ኪዩስ። 18 ፓራታ ዶናፕ ኪዩዳ ታማን፣ ጩያኒኔ ዲኒያን ሄ ሄዥ ጋዶታን ሳዓን ዴዒያ አሳፕ ሲኮይ ሃይቂስ። 19 ሄ ፓራታ ዎልቃይ ኤንታ ዶና ጊዶኒኔ ጎይናን ዴዔስ። ኤንታ ጎይናይካ ሾሻ ሁዔ ሜላ፤ ኤንቲ ኢያራ አሳ ቆሆሶና።

20 ሃ ጋዶታፕ አቲዳይሳቲ ባንታ ኩሼ አሱዎፕ ሲሚቦኮና። ኤንቲ ቱና አያናን ዎርቃፌ፣ ቢራፕ፣ ናሴ ቢራታፕኔ ሹቻፌ አሴቲዳ ኤቃስ ጎይናሶና። ዌላናው፣ ሲዓናው፣ ሃሙታናው ዳንዳዎና ኤቃታስ ጎይኔይሳ አጊቦኮና። 21 አሳይ ዎዴይሳ፣ ቢቴይሳ፣ ላይማቴይሳኔ ካይሴይሳ አጊዲ ማሮታ አይቺቦኮና።

10

ኪታንቸዎኔ ጉሳ ማፃፋ

1 ሄሳፌ ጉዩ፣ ታ ሃራ ዎልቃማ ኪታንቸይ ሳሎፕ ሳዓ ዎዲሺን ቤዓስ። ኢ ሻራ ማዒስ፤ ኢያ ሁዒያ ቦላ ዙላይ ዴዔስ። ኢያ ሶምዎይ አዎ ሜላ፤ ኢያ ቶሆይ ታማ ቱሳ ሜላ። 2 ሄ ኪታንቸይ ዶያ ዴዒያ ኢሲ ጉሳ ፃሳ ማፃፋ ባ ኩሼን አይኪዲ፣ ባ ኡሻቻ ቶሁዎ አሳ ቦላ፣ ባ ሃዲርሳ ቶሁዎ ቢታ ቦላ ኤሲስ። 3 ጉዲያ

9:9 ኢዩ 2:5 9:13 ኬሳ 30:1 9:20 ማዝ 115:4

ጋምዳ ባ ቃላ ጵቁ አሲዲ ዋሲስ። ኢ ዋሲዳ ዎዴ ላፑን ዳዳቲ ባንታ ጉንሳ ሲሲዶሶና።

4 ላፑን ዳዳቲ አዲቲዳ ዎዴ ታ ፃፋናው ጊጌታስ። ሺን ሳሎፕ፡ «ላፑን ዳዳቲ አዲዳይሳ ማታሜን ጎርዳፌ አቲን ፃፎፓ» ያጊያ ጊርሳ ሲዓስ።

5 ያቲዲ፡ አባ ቦላኔ ቢታ ቦላ ኤቂዳ፡ ታ ቤዒዳ ኪታንቾይ፡ ባ ኡሻቻ ኩሺያ ሳሎ ፑዴ ሚጨሰ። 6 ኢ ሚጨዲ ሳሎኒኔ ኢያ ጊዶን ዴዒያ ኡባ፡ ሳዓኒኔ ኢያ ጊዶን ዴዒያ ኡባ፡ አባኔ ኢያ ጊዶን ዴዒያ ኡባ ሜዲዳ፡ ሜሪናው ዴዒያ ያሳ ሱንሳን ጫቂዲ፡ «ሂዛፕ ጉዩ፡ ያሳይ ጋምዴና። 7 ሺን ላፑንሳ ኪታንቾይ ባ ዋይዚያ ፕኒያ ዎዴ ያሳይ ባ አይሌ ጊዲዳ ናቤታ ባጋራ ቆንጨሲዳ ፀራ ቆፋይ ፖሌታና» ያጊስ።

8 ሄሳፌ ጉዩ፡ አባ ቦላኔ ቢታ ቦላ ኤቂዳ፡ «ኢያ ኩሺን ዶዩቲዲ ዴዒያ ፃላ ማፃፋ ኪታንቾዋ ኩሺፕ ኤካ» ያጊዲ ናምዓንሶ ታው አዲሺን ሲዓስ።

9 ታኒ ሄ ኪታንቾዋኮ ባዳ፡ ጉሳ ፃላ ማፃፋ ኢማ ጋዳ አይቻስ። ኢ ታኮ፡ «ኤካዳ ማ፤ ኢ ኔ ኡሎን ጫማና፡ ሺን ኔ ዶናን ኤሳዳ ማልዓና» ያጊስ።

10 ታኒ ኪታንቾዋ ኩሺፕ ሄ ጉሳ ፃላ ማፃፋ ኤካዳ ማስ፤ ታ ዶናን ኤሳዳ ማልዒስ፡ ሺን ታ ኡሎን ጫሚስ። 11 ሄሳፌ ጉዩ፡ ታኮ፡ «ኔኒ ያራ ኡባስ፡ ዴሬ ኡባስ፡ ዱማ ዱማ ዶናን አዴቴይሳታሲኔ ካዎታስ ቲንቢቴ ዛራ አዳናው ቤሴስ» ያጊስ።

11

ናምዑ ማርካታ

1 ሄሳፌ ጉዩ፡ ታው ዋዳ ፃምዓ ኢሚዲ፡ «ባዳ ያሳ ኬሳኔ ያርሾ ቤሳ ዋዳ፤ ያን ጎይኒያ አሳታካ ፓይዳ። 2 ሺን ያሳ ኬሳ ካሬ ዳባባይ አይሁዴ ጊዶና አሳስ ኢሜቲዳ ጊሾ ዋዶና አጋጋ። አይሁዴ ጊዶና አሳይ ጊሻ ካታማ አይታማኔ ናምዑ አጊና ሃራና።

3 ታኒ ካሌ ማዒዳ ታ ናምዑ ማርካታ ኪታና፤ ኤንቲ 1260 ጋላስ ቲንቢቴ አዳና» ያጊስ።

4 ሄ ናምዑ ማርካቲ አላሚያ ጎዳ ሲንሳን ኤቂያ ናምዑ ሻማሆ ሚሳታኔ ናምዑ ያምፕ ዎሲያ ኮጫታ። 5 አኒካ ኤንታ ቆሃናው ኮይኮ ኤንታ ዶናፕ ታሚ ኬዩዲ፡ ኤንታ ዋርኬታ ዳይሴስ። ኤንታ ቆሃናው ኮያ አኒካ ሄሳዳ ሃይቃና። 6 ኤንቲ ቲንቢቴ አዲያ

10:5 ኬሳ 20:11፤ ዛሬ 32:40፤ ዳኔ 12:7፤ አሞ 3:7 10:8 ሂዝ 2:8-3:3
11:1 ሂዝ 40:3፤ ዛካ 2:1 11:2 ሉቃ 21:24 11:4 ዛካ 4:3

ዎዴ ኢሪ ቡኮና ሜላ ሳሉዋ ኅርዳናው ኤንታው ማቲ ዴዔስ።
ኤንታው ሃሴ ሱሲ ኪሳናው፥ ቃሲ ኤንቲ ኮዪዳ ሜላ ቢታ ዲማ
ዲማ ጋዶን ጳይሳናው ኤንታው ማቲ ዴዔስ።

7 ኤንቲ ባንታ ማርካቴሳ ኦንጊዳፔ ጉዬ፥ አላፌ ኪያ ዶዓይ
ኤንታና አላና። ሄ ዶዓይ ኤንታ ያናና፤ ዎጳና። 8 ኤንታ ኅዳይ
ማስቃሊያ ቦላ ካቁቲዳ ጊታ ካታማ አጊያ ቦላ ኤንታ አሃይ
ዬጌታና። ሄ ካታማይ ሌሚሶን ሶዶሜ ዎይኮ ጊብዔ ጌቴቲ ዔጌቴስ።

9 ቃሲ ዜሬሲ ኡባፌ፥ ያራ ኡባፌ፥ ዲማ ዲማ ዶናፔጌ ካዎቴሲ
ኡባፌ ዪዳ አሳይ ኤንታ አሃ ሄኹ ጋላሲኔ ባጋ ጋካናው ቤዓና።
ኤንታ አሃይ ሞጌቶና ሜላ አሳይ ዲጋና። 10 ሃ ናምዑ ናቤቲ ሳዓን
ዴዒያ አሳይ ሞጌቶን ጊሾ አሳይ ኤንታ ሃይቁዋን ኡፋይታና። ባንታ
ኡፋይሳ ቤሳናው ኢሶይ ኢሱዋስ ኢሞታ ኢማና።

11 ሄኹ ጋላሲኔ ባጋፌ ጉዬ፥ ዴያ አያናይ ያሳ ማታፔ ዪዲ
ኤንታን ጌሊን፥ ኤንቲ ዴንዲ ኤቂዶሶና። ኤንታ ቤዒዳ ኡባይ
ጊታ ያሺ ያዪዶሶና። 12 ሄሳፌ ጉዬ፥ ሄ ናምዑ ናቤቲ፥ «ሃ
ፑዴ ኪዬቴ» ጊያ ቃላ ሳሎፔ ሲዒዶሶና። ኤንታ ሞርኬቲ ኤንታና
ቤዒሺን፥ ኤንቲ ሻራን ጌሊዲ ፑዴ ሳሎ ቢዶሶና።

13 ሄ ሳቲያን ቤታይ ዎልቃማ ቃዎ ቃዒን፥ ካታማፔ ታማንሶ
ኩሼይ ጳይስ። ቃሲ ቢታ ቃዎን ላፑን ሙኩሉ አሳይ ሃይቁስ።
አቲዳ አሳይ ዳሮ ኮኮሪዲ ባቢዲ፤ ሳሎ ያሳስ ቦንቾ ኢሚዶሶና።

14 ናምዓንሶ አዬይ አዲስ፥ ሺን ሄኮ ሄኸንሶ አዬይ ኤሶን ያና።

ላፑንሳ ሞይዚያ

15 ላፑንሳ ኪታንቾይ ባ ሞይዚያ ፑኒስ። ሳሎፔ፥ «ሳዓ
ካዎቴሳይ ኑ ኅዳሲኔ ኪሪስቶሳስ ጊዲስ፤ ኢ ሜሪናፔ ሜሪና
ጋካናው ሃራና» ያጊያ ዎልቃማ ቃላይ ሲዔቲስ። 16 ያቲን፥ ያሳ
ሲንሳን፥ ባንታ አራታን ኡቲዳ ሳታማኔ አይዱ ጨማቲ ጉፋኒዲ፥
ያሳስ ኅይኒዲ፥

17 «ሃዒካ ካሴካ ዴዔይሶ፥
ኅዳው፥ ኡባፌ ዎልቃማ ያሳው፥

ኔኒ ጊታ ዎልቃ አይካዳሳ።

ኔኒ ሃራናው ዶሚዳ ጊሾ

ኑኒ ኔና ጋላቶስ።

18 አይሁዴ ጊዶና አሳይ ሃንቁቲዶሶና፥

ሺን ኔ ሃንቆይ ዪስ።

11:6 1ካዎ 17:1፤ ኪሳ 7:17 11:7 ዳኔ 7:7፤ ዮቆ 13:5 11:8 ኢሳ
1:9 11:11 ሂዝ 37:10 11:12 2ካዎ 2:11 11:13 ዮቆ 6:12፤ 16:18
11:15 ኪሳ 15:18፤ ዳኔ 2:44፤ 7:14 11:17 ኪሳ 3:14 11:18 ማዝ
2:5፤ 110:5፤ 115:13

ሃይቂዳይሳታ ቦላ ኔ ፐርዲያ ዎዴይ ዩስ።
 ኔኔ ኔ አይሌታ፣ ናቤታስ
 ጌሻታሲኔ ኔ ሱንሳስ ያዩይሳታስ።
 ጉሳታሲኔ ጊታታስ፣ ኤንታ አሱዋዳ ኢሚያ ዎዴይ ጋኪስ።
 አላሚያ ጳይሴይሳታ ጳይሲያ ዎዴይ ዩስ»
 ያጊዶሶና።

19 ሳሎን ዴዲያ ያሳ ኬሳይ ዶዩቲስ፤ ኢያ ጊዶን ያሳ ጫቆ ታቦቴይ ቤንቲስ። ቃሲ ዎልዓንሲ ዎልዓሚስ፣ ዴሾይ ዴቺስ፤ ዳዲ ጳቂስ፤ ቤቲ ቃሂስ፤ ሻቺ ቡኪስ።

12

ማጫሲውኔ ዳዊያ

1 ሄሳፌ ጉዩ፣ ሳሎን ዎልቃማ ማላቲ ቤንቲስ። አዋ ማዓዳ፣ አጌና ቦላ ኤቃዳ፣ ታማኔ ናምዑ ያሊንቶ ካላቻ ባ ሁዔን ዎሲ ዳዲያ፣ ኢሲ ማጫሲያ ቤንታሱ። 2 ሄ ማጫሲያ ቃንጮሺን፣ ኢዮ ኢቁሲ አይኪን ኡንዔታዳ ዋሳሱ።

3 ቃሲ ሃራ ማላቲ ሳሎን ቤንቲስ። ላፑን ሁዔቲኔ ታሙ ካጩቲ ዴዲያ ጊታ ዞዎ ዳዌይ ቤንቲስ። ኢ ባ ሁዔታ ቦላ ላፑን ካላቻ ዎሲስ። 4 ሄ ዳዌይ ባ ጎይናን ያሊንቶታፔ ሲኩዋ ሳሎፔ ዳፊዲ ሳዓን ዩጊስ። ሄ ዳዌይ ናዓይ ዩሌቲ ዎዲዳ ሜላ ሚታናው ኮዩዲ፣ ዩላናው ኤቁቲያ ማጫሴ ሲንሳን ኤቁስ።

5 ሄ ማጫሲያ ካዎቴሳ ኡባ ቢራታ ፃምዓን ሃራናው ዴዲያ አዴ ናዓ ዩላሱ። ናዓይ ያሳኮኔ ኢያ አራታኮ ፑዴ ኤኬቲስ።

6 ማጫሲያ 1260 ጋላስ ጋካናው ኢዮ ናጋና ሜላ ያሳይ ኢው ጊጊሲ ዎሲዳ ቤሳ ባዞ ቢታ ባቃታሱ።

7 ሳሎን አሊ ሜዴቲስ። ሚካዔሌይ ባ ኪታንቾታራ ዳዊያራ አሌቲስ፤ ዳዌይ ባ ኪታንቾታራ ጊዲዲ ዛሪ አሌቲስ። 8 ሺን ዳዌይ ያኔቲዲ ሳሎን ኤንታው ዴዲያ ቤሲ ጳዩዶሶና። 9 ጊታ ዳዌይ፣ ቤኔ ሾሻይ፣ ሳዓን ዩጊቲስ። ኢካ ዳቡሎሳ ዎይኮ ፃላሄ ጊቴቲያ አላሚያ ባሌሴይሳ። ኢ ባ ኪታንቾታራ ኢሲፌ ዱጌ አላሚያ ዩጊቲስ።

10 ሄሳፌ ጉዩ፣ ሳሎን ሃይሳዳ ያጊያ ቃላ ሲዓስ።

«ሃዲ አቶቴሳይ፣ ዎልቃይኔ ካዎቴሳይ፣ ኑ ያሳሳ፤

ማታይ ኪሪስቶሳስ ጊዲስ።

ሂዛ፣ ቃማኔ ጋላስ ያሳ ሲንሳን፣

11:19 ዮ.ቆ 8:5፤ 16:18፣ 21 12:3 ዳኔ 7:7 12:4 ዳኔ 8:10 12:5 ኢሳ 66:7፤ ማዝ 2:9 12:7 ዳኔ 10:13 12:9 ሜዴ 3:1፤ ሉቃ 10:18

ኑ ኢሻታ ሞቴይሲ ሳሎፔ ዱጌ ሆሌቲስ።
 11 ኤንቲ ዶርሳ ሱሳኒኔ ባንታ ማርካቴሳ ቃላን፥
 ኢያ ኦሊዲ ያኒዶሶና።
 ኤንቲ ባንታ ሽምፑዋስ ሚሼቶና
 ባንታና ሃይቆስ አሲ ኢሚዶሶና።
 12 ሄሳ ጊሾ፥ ሳሎኒኔ ኢያ ጊዶን ዴዔይሳቶ ኡፋይቲቴ።
 ሺን ቢታኔ አባ አቶ!
 ሂዛ፥ ዓላሄይ ባው ጉሳ ዎዴይ አቲዳይሳ ኤሪዳ ጊሾ
 ዎልቃማ ሃንቆን ሂንቴኮ ዎዲስ»
 ያጊስ።

13 ቃሲ ዳዌይ ባና ሳዓ ዩጊዳይሳ ቢዲዳ ዎዴ አዴ ናዓ ዩሊዳ ማጫሲው ጎዲስ። 14 ማጫሲው ሾሻይ ቆሆና ሜላ ሄዥ ላይሴኔ ባጋ ማሼኔ ኡያሾ ኢያ ናጌቲያ ቤሲ ባዞ ቢታ ፒራዳዳ ባና ሜላ ናምዑ ዎልቃማ አርጋንሳ ቁፌይ ኢው ኢሜቲስ።
 15 ያቲዲ፥ ማጫሲው ዲያይ ዲዲዲ ኤፋና ሜላ ዳዌይ ሻፋ ሃሳ ሜላ ባ ዶናፔ ማጫሴ ጉዩራ ጮዩስ። 16 ሺን ቢታይ ማጫሲው ማዲስ፤ ቢታይ ባ ዶና ዶዩዲ ዳዊያ ዶናፔ ኬዩዳ ሃሳ ሚቲስ።
 17 ሄ ዳዌይ ማጫሴ ቦላ ዳር ሃንቁቲዲ፥ ኢ ዜሬሳታ፥ ያሳ ኪታ ናጌይሳታኔ ዩሱሲ ቆንጫሲዳ ቱማስ አማኔቲዳይሳታ አላናው ቢዲ። 18 አባ ጋፃን ዴዲያ ሻፊያን ኤቂስ።

13

ናምዑ ዶዳታ

1 ሄሳፌ ጉዩ፥ ኢሲ ዶዳይ አባፌ ኬዩሺን ቤዓስ። ኢያው ታሙ ካጩይኔ ላፑን ሁዔይ ዴዔስ። ሄ ታሙ ካጩታ ቦላ ታሙ ካላቻቲ ዴዎሶና። ሄ ሁዔታ ቦላ ያሳ ጫሻ ሱንሳቲ ዓፌቲዲ አቲስ። 2 ታ ቤዲዳ ዶዳይ ማሄ ዳኔስ፤ ኢያ ቶሆይ ባባንሳ ቶሆ ሜላ፤ ኢያ ዶናይካ ጋሞ ዶና ዳኔስ። ዳዌይ ባ ዎልቃ፥ ባ አራታኔ ባ ጊታ ማታ ሄ ዶዳስ ኢሚስ።
 3 ሄ ዶዳ ሁዲያፔ ኢሱዋ ቦላ ሃይቆስ ጋሲያ ማዱንሲ ቤዓስ፥ ሺን ሄ ማዱንሳይ ፓዒስ። አላሚያ አሳ ኡባይ ማላሌቲዲ ሄ ዶዳ ካሊስ። 4 ዳዌይ ባ ማታ ዶዳስ ኢሚዳ ጊሾ አሳ ኡባይ ዳዊያ ጎይኒዶሶና። ቃሲ አሳይ፥ «ዶዳ ሜሲ አኔ? ኢያራ አሌታናው ዳንዳዔይ አኔ?» ያጊዲ ዶዳስ ጎይኒዶሶና።
 5 ሄ ዶዳስ አቶርታና ሜላኔ ጫያና ሜላ ዶኒ ኢሜቲስ፤ አይታማኔ ናምዑ አጌና ሃራና ሜላ ማቲ ኢያው ኢሜቲስ።

12:10 ኢዮ 1:9 12:14 ዳኔ 7:25፤ 12:7 13:1 ዳኔ 7:3፤ ዮቆ 17:3
 13:2 ዳኔ 7:4 13:5 ዳኔ 7:8፤ 25፤ 11:36

6 ሄ ደዓይ ያሳ፥ ኢያ ሱንሳ፥ ኢ ዴዲያ ቤሳኔ ሳሎን ዴዲያ ኡባ ቃንጌሲ አይኪስ። 7 ሄ ደዓይ ጌሻታራ አሌቲዲ፥ ኤንታና ያናና ሜላ ዎልቂ ኢያው ኢሜቲስ። ያራ ኡባ፥ ዴሬ ኡባ፥ ዱማ ዱማ ደና ኡባ ቦላኔ ዜሬሲ ኡባ ቦላ ማቲ ኢያው ኢሜቲስ። 8 አላሜይ ሜዴቶሳፕ ደሚዲ፥ ሹኪቲዳ ዶርሳ ዴያ ማፃፋን ኤንታ ሱንሳይ ፃሬቶና ሃ ሳዓን ዴዲያ አሳ ኡባይ ሄ ደዓስ ጎይናና።

9 ሲዲያ ሃይሲ ዴዲያ አሲ ሲያ። 10 አኒካ ዲዔታናው ዴዔይ ዲዔቲስ። ማሻን ሃይቃናው ዴዔይ ማሻን ሹኪታና። ሄሳንካ ጌሻታ ዳንዳዳይኔ አማኖይ ኤሬታና።

11 ቃሲካ፥ ሃራ ደዲ ሳዓፕ ኬዩሺን ቤዓስ። ኢያው ዶርሳ ካጩ ዳኒያ ናምዑ ካጩይ ዴዔስ፤ ኢያ ሃሳያይ ዳዌይሳ ሜላ።

12 ሄ ደዓይ ኮይሮ ደዓ ቤሳን፥ ኢያ ማታን አሴስ። ኢካ ሃይቆስ ጋሲያ ማዱንሳሬ ፓዲዳ ኮይሮ ደዓስ፤ ቢታን ዴዲያ አሳ ኡባይ ጎይናና ሜላ አሴስ። 13 ሄ ናምዓንሶ ደዓይ ሃሪ አቶሺን፥ ታማ ሳሎፕ አሳ ኡባ ሲንሳን ዎዲሳና ጋካናው ጊታ ማላታታ አሴስ።

14 ኮይሮ ደዓ ቤሳን አሳና ሜላ፥ ኢያው ኢሜቲዳ ማላታታን ሳዓን ዴዲያ አሳ ኡባ ኢ ባሌሲስ። ማሻን ማዱንዲ ፓዲዳ ደዓ ቦንቾስ ሚሲሌ ጊጊሳና ሜላ ኤንታና ኪቲስ። 15 ናምዓንሶ ደዓይ ኮይሮ ደዓ ሚሲሊያስ ሼምፖ ኢሚዲ አዴታና ሜላኔ ኢያው ጎይኖናይሳቲ ሃይቃና ሜላ አሲያ ማቲ ኢሜቲስ።

16 ሄ ናምዓንሶ ደዓይ ጊቲኔ ጉሲ፥ ማንቆይኔ ዱሬይ፥ ዎማኖይኔ አይሌይ ባ ኡሻቾ ኩሺን ዎይኮ ባ ሶምዖን ማላ ዎሳና ሜላ አሴስ።

17 ሄ ደዓ ሱንሳይ ዎይኮ ኢያ ሱንሳ ፓይዱዎ ማላይ ባይና አሲ አኒካ ባይዛናው ሻማናው ዳንዳዔና።

18 ጨንጫቴሲ ኮሼይ ሄሳና። ኤራቴሲ ዴዲያ አኒካ ሄ ደዓ ፓይዱዎ ቢርሼሳ ኤሮ፤ ሄ ፓይዶይ አሳ ሱንሳ። ሄ ፓይዶይ ኡሱፑን ዪታኔ ኡስፑን ታማኔ ኡሱፑና።

14

ዶርሳኔ 144፥000 አሳ

1 ሄሳሬ ጉዩ፥ ዶርሳይ ዒዮኔ ዴሪያ ቦላ ኤቂዳይሳ ቤዓስ። ኢያራ ኢያ ሱንሳይኔ ኢያ አዎ ሱንሳይ ኤንታ ሶምዖን ፃሬቲዳ፥ 144፥000 አሳይ ዴዔስ። 2 ሳሎፕ ጊታ ሃሳ ጉንሱኔ ዳዳ ጉንሱ ዳኒያ ዎልቃማ ጊርሲ ሲዓስ። ቃሲ ታ ሲዲዳ ጊርሳይ ዲሲ ዲሻሺን ሲዔቲያ ጊርሳ ሜላ። 3 144፥000 አሳይ አራታ ሲንሳን፥ አይዱ ዴዖን ዴዲያ ሜዴቴሳታ ሲንሳኔኔ ጨማታ

13:7 ዳኔ 7:21 13:8 ማዝ 69:28 13:10 ኤር 15:2፤ 43:11 14:1 ሂዝ 9:4፤ ዮቆ 7:3

ሲንሳን ኤቂዲ ኤንታፌ ሃራ አኒካ ታማራናው ዳንዳዖና አራሳ ማዘሙሬ ዩቢዶሶና።⁴ ሃይሳቲ ማጫሳራ ባንታና ቱኒሶና ናጊዳ ጌሻታ። ኤንቲ ዶርሳይ ቢያሶ ኡባ ካሎሶና። ኤንቲ ዶሳሲኔ ዶርሳስ ባይራ ጊዲዲ፣ ሺቃናው ሳዓ አሳ ጊዶፌ ዎዜቲዶሶና።⁵ ኤንቲ ዎርዶይኔ ቦሬይ ባይና አሳታ።

ሄዥ ኪታንቾታ

⁶ ሄሳፌ ጉዩ፣ ሜሪና ዎንጌላ ሳዓ ቦላ ዴዲያ ካዎቴሳ ኡባስ፣ ዜሬሴ ኡባስ፣ ያራ ኡባሲኔ ዱማ ዱማ ዶና ኡባስ ማርካታናው ሳሎራ ፒራዲያ ሃራ ኪታንቾ ቤዓስ።⁷ ሄ ኪታንቾይ ባ ቃላ ዶቁ አሲዲ፣ «ዶሳይ አላሚያ ፒርዲያ ሳቴይ ጋኪዳ ጊሾ ዶሳስ ያዩቴ፤ ኢያ ቦንቹቴ። ሳሎ፣ ሳዓ፣ አባኔ ፑልቶ ሃላ ሜዲዳ ዶሳ ጎይኒቴ» ያጊስ።

⁸ ኮይሮይሳ ካሊዲ ሃራ ናምዓንሶ ኪታንቾይ፣ «ዴሬ ኡባ ቱናኔ ማሶ ዎይኔ ኡሺዳ፣ ጊታ ባቢሎኔይ ኩንዳሱ! ኩንዳሱ!» ያጊዲ ዋሲስ።

⁹ ሄሻንሶ ኪታንቾይ ኤንታ ካሊዲ፣ ባ ቃላ ዶቁ አሲዲ፣ «ዶዓኔ ኢያ ሚሲሊያ ጎይኒያ ቃሲ ኢያ ማላ ባ ሶምዖን ዎይኮ ባ ኩሼን ዎሲያ አኒካ ዴዲኮ፣¹⁰ ኢ ሃንቆ ፁዓን ኩሚዳ ዶሳ ሃንቆ ዎይኒያ ኡያና። ኤንቲ ጌሻ ኪታንቾታ ሲንሳኒኔ ዶርሳ ሲንሳን ኤቢያ ዲኔ ታማን ዋዩታና።¹¹ ኤንታ ዋያ ጩያይ ሜሪ ሜሪናው ጩዩሼ ዳና። ዶዓኔ ኢያ ሚሲሊያ ጎይኔይ ቃሲ ሄ ዶዓ ሱንላ ማላይ ዴዲያ አኒካ ቃማኔ ጋላስ ሽምፓይ ባይና ካዔታና» ያጊስ።

¹² ዶሳ ኪታ ናጌይሳቲኔ ዩሱሳ አማኔቴይሳቲ ጌንጩያ ሚኖቴሳይ ቆንጩያ ዎዴይ ሄሳ።

¹³ ሄሳፌ ጉዩ፣ «ሂዛፕ ጎዳን ሃይቁይሳቲ አንጄቲዳይሳታ» ያጊያ ቃላ ሳሎፕ ሲዓስ።

አያናይ፣ «ኤ ቱማ፣ ኤንታ አሶይ ኤንታ ካሊያ ጊሾ ኤንቲ ባንታ ዳቡራፔ ሽምፓና» ያጌስ።

ካላ ሺሾ ዎዴ

¹⁴ ሄሳፌ ጉዩ፣ ቦላ ሻራ ቦላ ኡቲዳ አሳ ናዓ ዳኔይሳ ቤዓስ። ኢ ባ ሁዔን ዎርቃ ካላቻ ዎሲስ፤ ቃሲ ባ ኩሼን ባጫ አይኪስ።

¹⁵ ሃራ ኪታንቾይ ዶሳ ኬሳፌ ኬዩዲ፣ ሻራ ቦላ ኡቲዳይሳኮ ባ ቃላ ዶቁ አሲዲ፣ «ካላ ሺሾ ዎዴይ ጋኪዳ ጊሾ ኔ ባጫ ዩዳዳ

14:5 ሰር 3:13 14:8 ኢሳ 21:9፤ ኤር 51:8፤ ዮቆ 18:2 14:10 ኢሳ 51:17፤ ሜዴ 19:24፤ ሂዝ 38:22 14:11 ኢሳ 34:10 14:14 ዳኔ 7:13-14

ካላ ጫካ፤ ሳዓን ዴዲያ ካላይ ጋኪስ» ያጊስ። 16 ያቲን ሻራ ቦላ ኡቲዳይሲ ባ ባጫ ሳዓ ዩዲዲ፥ ሳዓን ዴዲያ ካላ ጫኪስ።

17 ቃሲካ ሳሎን ዴዲያ ያሳ ኬሳፌ ሃራ ኪታንቾይ ኬዩስ፤ ኢያዉካ ኦጮ ባጪ ዴዴስ።

18 ታማ ቦላ ማቲ ዴዲያ ሃራ ኪታንቾይ ያርሾ ቤሳፌ ኬዩስ። ኢ ባ ቃላ ድቁ አሲዲ አጮ ባጫ አይኪዳ ኪታንቾዋኮ፥ «ዎይኔ አይፌይ ቴሪዳ ጊሾ ኔ አጮ ባጫ ዩዳዳ፥ ሳዓን ዴዲያ ዎይኒያፕ ቃንፃ» ያጊስ። 19 ሄ ኪታንቾይ ባ ባጫ ዩዲዲ፥ ሳዓን ዴዲያ ዎይኒያፕ ቃንፃዲ፥ ያሳ ጊታ ሃንቁዋ ጉምዲያ ቤሳን ዩጊስ።

20 ኤንቲ ካታማፕ ጋፃን ዴዲያ ዎይኔ አይፌ ጉምዲያ ቤሳን ዩዲዲያ፥ ሱሲ ዎይኒያ ጉምዲያ ቤሳፌ ኬዩዲ ኢሲ ሙኩሉኔ ኡስቸን ዪቱ ኪሎ ሚቲሬ ሜላ ሃኪዲ፥ ፓራ ፑሎ ጋኪያ ሜላ ኤሊዲ ድቁ ጊስ።

15

ዉርሴላ ቦሻታ

1 ታኔ ሳሎን ሃራ ጊታኔ ማላሊሲያ ማላታ ቤዓስ። ያሳ ዉርሴላ ሃንቁዋ ቆንጮሲያ ላፑን ቦሻታ አይኪዳ ላፑን ኪታንቾቲ ዴዎሶና።

2 ቃሲ ታማራ ዋላኬቲዳ ቡርጩኮ አባ ዳኔይሳ ቤዓስ። ሄ አባ ጋፃን ዶዓ፥ ኢያ ሚሲሊያኔ ኢያ ሱንሳ ታይቡዋ ያኒዳይሳታ ቤዓስ። ያሳይ ኤንታው ኢሚዳ ዲላ አይኪዲ ኤቂዶሶና። 3 ኤንቲ ያሳ አይሊያ ሙሴ ማዝሙሪያኔ ዶርሳ ማዝሙሪያ ሃይሳዳ ያጊድ ዩዎሶና።

«ጎዳው፥ ኡባፌ ዎልቃማ ያሳው፥

ኔ አሶይ ጊታኔ ማላሊሲያባ።

ዴሬ ኡባ ካዋው፥

ኔ አጌይ ዒሎኔ ቱማ።

4 ጌሺ ኔ ፃላላ ጊዲያ ጊሾ

ጎዳው፥ ኔው ያዮናይኔ

ኔ ሱንሳ ቦንቾናይ ኦኔ?

ኔ ዒሎ አሶይ አሳ ኡባስ ቆንጮ ጊዲያ ጊሾ

ካዎቴሲ ኡባይ ኔ ሲንሴ ዩዲ ጎይናና»

ያጊዲ ዩዎሶና።

5 ሄሳፌ ጉዩ፥ ሳሎን ዶዩቲዲ ዴዲያ ያሳ ኬላ፥ ኢካ ማርካቴላ ዱንካኒያ ቤዓስ። 6 ላፑን ቦሻታ አይኪዳ ላፑን ኪታንቾቲ ያሳ ኬላፌ ኬዩዶሶና። ኤንቲ ጌሺኔ ጳሊያ ሊኖ ማዎ ማዲዶሶና፤ ባንታ

14:15 ኢዩ 3:13 14:20 ኢሳ 63:3፤ ኤርዘ 1:15፤ ዮቆ 19:15 15:3 ኬላ 15:1 15:4 ኤር 10:7፤ ማዝ 86:9 15:5 ኬላ 38:21

ትራን ዎርቃ ዳንጮ ዳንጪዶሶና። ⁷ አይዱ ሜዴቴላታፕ ኢሶይ፥ ሜሪናው ዴዲያ ያሳ ሃንቆይ ኩሚዳ ላፑን ዎርቃ ፀ-ዓታ ላፑን ኪታንቾታስ ኢሚስ። ⁸ ያሳ ቦንቹዋሬኔ ኢያ ዎልቃሬ ዴንዶይሳን ያሳ ኬሳይ ጩያን ኩሚስ። ላፑን ኪታንቾቲ አይኪዳ ላፑን ቦሻቲ ፖሌታና ጋካናው ያሳ ኬሳ አኒካ ገላናው ዳንዳዒቤና።

16

ያሳ ሃንቆይ ኩሚዳ ፀ-ዓታ

¹ ሄሳሬ ጉዬ፥ ያሳ ኬሳሬ ላፑን ኪታንቾታኮ፥ «ቢዲ ያሳ ሃንቆዋ ላፑን ፀ-ዓታፕ ሳዓን ጉሲቴ» ያጊዲ፥ አዲያ ዎልቃማ ቃላ ሲዓስ።

² ኮይሮ ኪታንቾይ ቢዲ፥ ባ ፀ-ዓን ዴዴይሳ ሳዓን ጉሲን፥ ዶዓ ማላይ ዴዴይሳታ ቦላኔ ኢያ ሚሲሊያ ጎይኒዳይሳታ ቦላ ኢታኔ ዛሚያ ማዱንሴ ኬይስ።

³ ናምዓንሶ ኪታንቾይ ባ ፀ-ዓን ዴዴይሳ አባን ጉሲን፥ አባይ ሃይቂዳ አሳ ሱሴ ዳኒስ። ቃሲ አባን ዴዲያ ሜዴቴላ አባይ ሃይቂስ።

⁴ ሄቫንሶ ኪታንቾይ ባ ፀ-ዓን ዴዴይሳ ሻፋታኒኔ ፑልቶ ሃሳታን ጉሲን፥ ሃሳቲ ሱሴ ጊዲዶሶና። ⁵ ሄሳሬ ጉዬ፥ ሃሳ ቦላ ማቲ ዴዲያ ኪታንቾይ ሃይሳዳ ያጊሺን ሲዓስ።

«ሃዒካ ቤኒካ ዴዲያ ጌሻው፥

ሃይሳዳ ኔ ፐርዲዳ ጊሾ ኔኒ ዒሎ።

⁶ ኤንቲ ጌሻታ ሱሳኔ ናቤታ ሱሳ ጉሲዳ ጊሾ

ኤንቲ ሱሱ ኡያና ሜላ አሳዳሳ።

ኤንቲ ባንታው ቤሲያባ ኤኪዶሶና»

ያጊስ። ⁷ ያርሾ ቤሳሬ፥

«ጎዳው፥ ኡባሬ ዎልቃማ ያሳው፥

ኔ ፐርዳይ ቱማኔ ዒሎ»

ያጊያ ቃላ ሲዓስ።

⁸ አይዳንሶ ኪታንቾይ ባ ፀ-ዓን ዴዴይሳ አዋ ቦላ ጉሲን፥ አዋይ ባ ሴላን አሳ ፀ-ጋና ሜላ አዋስ ዎልቂ ኢሜቲስ። ⁹ አሳይ ዎልቃማ ሴላን ፀ-ቴቲዲ፥ ሄ ቦሻታ ቦላ ማቲ ዴዲያ ያሳ ሱንሳ ባዲዶሶና፤ ባንታ ናጋራፕ ሲሚዲ ያሳ ቦንቹቦኮና።

¹⁰ ኢቻሻንሶ ኪታንቾይ ባ ፀ-ዓን ዴዴይሳ ዶዓ አራታ ቦላ ጉሲን፥ ሄ ዶዓ ካዎቴሳይ ዱሚስ። አሳይ ኡንዓ ጊሾ ባንታ

15:8 ኬሳ 40:34፤ 1ካዎ 8:10 16:2 ኬሳ 9:10 16:4 ኬሳ 7:17 16:5 ኬሳ 3:14

ኢንግርሳ ሳዎሶና። 11 ቃሲ አሳይ ኡንዓ ጊሾኔ ማዱንሳ ጊሾ ሳሎ ያሳ ባዲዶሶና፤ ባንታ አሲዳ ናጋራፔ ሲሚቦኮና።

12 ኡሱፑንሳ ኪታንቾይ ባ ፀዓን ዴዔይሳ ጊታ ኤፊራዲሴ ሻፋን ጉሲን፤ ዶሎሃ ባጋፌ ያና ካዎታስ ኦጌይ ጊጋና ሜላ ሃሳይ ሜሊስ።

13 ሄሳፌ ጉዬ፤ ሾጴ ዳኒያ ሄሹ ቱና አያናቲ ዳዊያ ዶናፔ፤ ዶዓ ዶናፔኔ ዎርዶ ናቢያ ዶናፔ ኬዬሺን ቤዓስ። 14 ኤንቲ ማላታታ አሲያ ቱና አያናታ። ሄ ሄሹ ቱና አያናቲ ኡባፌ ዎልቃማ ያሳ ጊታ ጋላሳን ሃናናው ዴዲያ አላስ ሺሻናው አላሜ ካዎታ ኡባኮ ባና።

15 «ሄኮ፤ ታ ካይሶዳ ያና! አሳ ሲንሳን ካሎቶናዳኔ ዬላቶናዳ ባርኪዲ፤ ባ ማዑዋ ናጊያ ኡራይ አንጄቲዳይሳ!» ያጊስ።

16 ሄ ቱና አያናቲ ካዎታ ኢብራይስኔ ዶናን አርማጌዶኔ ጊያ ቤሳን ሺሺዶሶና።

17 ላፑንሳ ኪታንቾይ ባ ፀዓን ዴዔይሳ ጫርኮ ቦላ ጉሲን፤ ያሳ ኬሳን ዴዲያ አራታፔ፤ «ፖሌቲስ» ያጊያ ዎልቃማ ቃላይ ዩስ።

18 ሄሳፌ ዎልዓንሲ ዎልዓሚስ፤ ዳዳይ ጳቂስ፤ ቤታይ ቃዲስ። አሲ ሳዓን ሜዴቶሳፔ ቤቲ ሄሳ ሜላ ቃዎ ቃዲቤና። ሄሲ ኡባፌ አዲዳ ቃዎ። 19 ጊታ ካታማይ ሄሹ ኬዬዲ ሻኬቲስ፤ ቤታ ኡባን ዴዲያ ካታማቲ ጳዩዶሶና። ያሳይ ጊታ ካታማ ባቢሎኔ ቆፒዲ፤ ባ ኢታ ሃንቆ ዎይኔ ኡሻይ ኩሚዳ ፀዓ ኢው ኢሚስ። 20 ሃሳን ቱቄቲዳ ቤታቲ ጳዩዶሶና፤ ዴሬቲካ ቤንቲቦኮና። 21 አሳ ቦላ አይታማኔ ኢቻሾ ኪሎ ጊራሜ ሜላ ዴዲያ ዎልቃማ ሻቺ ሳሎፔ ቡኪስ። ቦሻይ ዳሮ ኢታ ጊዲያ ጊሾ አሳይ ሻቻ ቦሻ ጊሾ ያሳ ባዲዶሶና።

17

ጊታ ላይማቲያ ማጫሲው

1 ላፑን ፀዓታ አይኪዳ ላፑን ኪታንቾታፔ ኢሶይ ታኮ ዩዲ፤ «ሃያ፤ ዳሮ ሃሳታ ቦላ ኡቲዳ ጊታ ላይማቲያ ማጫሴ ቦላ ያናው ዴዲያ ፒርዳ ታ ኔና ቤሳና። 2 አላሚያ ካዎቲ ኢራ ላይማቲዶሶና፤ አላሜን ዴዲያ አሳይካ ኢ ላይማቲሳ ዎይኒያ ኡዩዲ ማሶቲዶሶና» ያጊስ።

3 ሄ ኪታንቾይ ታና ጌሻ አያናን ባዞ ቤታ ኤፊስ። ያን ኢሲ ማጫሲያ ጫሻ ሱንሳይ ኢ ቦላ ኡባን ያፌቲዲ ኡቲዳ፤ ዞዎ

16:10 ኬሳ 10:21 16:12 ኢሳ 11:15 16:15 ማቶ 24:43 16:16 2ካዎ 23:29፤ ዛካ 12:11 16:18 ዮቆ 8:5፤ 11:13 16:19 ኢሳ 51:17
16:20 ዮቆ 6:14 16:21 ኬሳ 9:23 17:1 ኤር 51:13 17:2 ኢሳ 23:17፤ ኤር 51:7

ደዓ ቶጊዳሮ ቤዓስ፤ ሄ ደዓስ ላፑን ሁዔይኔ ታሙ ካጩይ ዴዔስ።⁴ ሄ ማጫሲያ ካሎሴ ማዖኔ ዞዖ ማዖ ማዓሱ፤ ኢያ ዎርቃን፣ ቦንሾ ሹቻኒኔ ኢንቆ ጊያ አልዖ ሹቻን አሌቁታሱ። ኢያ ባ ኩሼን ቦርሲያባኔ ላይማቴላ ቴናቴላን ኩሚዳ ዎርቃ ፁዓ አይካሱ።⁵ ኢ ሰምዖን ፁራ አሶ ቢርሼላይ ዴዒያ ሱንሳይ፣ «ጊታ ባቢሎኔይ፣ ላይማቴላሲኔ ሳዓን ዴዒያ ቴናባ ኡባስ አዮ» ያጊያ ፁፌይ ሃፌቲዲ ኡቲስ።⁶ ቃሲ ሄ ማጫሲያ ጌሻታ ሱሳኔ ዮሱሳስ ማርካቲሼ ሃይቁዳይሳታ ሱሳ ኡያዳ ማሶቲዳሮ ታ ቤዓዳ ማላሌታስ።

⁷ ኪታንሾይ ታኮ፣ «ኔኒ አይስ ማላሌታይ? ታኒ ኔው ማጫሲ ፁራኔ ኢያ ቶኪዳ ላፑን ሁዔይኔ ታሙ ካጩይ ዴዒያ ደዓ ፁራ አዳና።⁸ ኔኒ ቤዒዳ ደዓይ ኮይሮ ዴዔስ፣ ሺን ሃዒ ባዋ። ሄ ደዓይ ጪዋ አላፌ ኬዩዲ ዳዮስ ባና። ሳዓይ ሜዴቶሳፔ ዶሚዲ፣ ዴዖ ማዓፋን ኤንታ ሱንሳይ ሃፌቲቦና ሳዓን ዴዒያ አሳይ ደዓ ቤዒዲ ማላሌታና። ሂዳ፣ ኢ ካሴ ዴዔስ፤ ሃዒ ባዋ፣ ሺን ሲንሳፌ ያና።

⁹ «ሃይሲ ጪንጫቴላኔ አኬካ ኮዮስ። ላፑን ሁዔቲ ማጫሲያ ኡቲያ ላፑን ዴሬታ፤ ሄሳቲ ቃሲ ላፑን ካዎታ።¹⁰ ኤንታፌ ኢቻሹ ካዎቲ ኩንዲዶሶና። ኢሶይ ሃዒ ጋካናው ሃሬስ፤ ሃንኮ ካዎይ ዩቤና። ኢ ዩዲ ጉሳ ዎዴ ታካናው ቤሴስ።¹¹ ሲንሴ ዴዒዳ ደዓይ፣ ሃዒ ባይናይሲ፣ ኢ ባ ሁዔን ሆስፑንላ ደዓ። ኢ ላፑን ደዓታፔ ኢሱዋ፤ ኢ ዳያናው ቤስ።

¹² ኔኒ ቤዒዳ ታሙ ካጩቲ ሃሮ ዶሚቦና ታሙ ካዎታ። ሺን ኤንቲ ደዓራ ኢሲፌ ኢሲ ሳቴ ካዎቲዲ ሃራናው ኤንታው ማቲ ኢሜታና።¹³ ኤንታ ኡባስ ኢሲ ቆፋይ ዴዔስ፤ ኤንቲ ባንታ ዎልቃኔ ባንታ ማታ ደዓስ ኢማና።¹⁴ ኤንቲ ዶርሳራ አሌታና፣ ሺን ዶርሳይ ጎዳታ ጎዳኔ ካዎታ ካዎ ጊዲያ ጊሾ ኢ ዔጊዳይሳቲ፣ ዶሪዳይሳቲኔ አማኔቲዳይሳቲ ሄ ካዎታ ያናና» ያጊስ።

¹⁵ ኪታንሾይ ቃሲካ ታኮ፣ «ላይማቴያራ ኡቲዳ ሄ ኔኒ ቤዒዳ ሃሳቲ ያራታ፣ ካዎቴላታ፣ ዜሬላታኔ ዱማ ዱማ ደናን አይጭይሳታ።¹⁶ ቃሲ ኔኒ ቤዒዳ ታሙ ካጩይኔ ደዓይ ላይማቴያሮ ኢዓና። ኤንቲ ኢው ዴዒያ ኡባባ ኤካና፣ ቃሲ ኢዮ ካሎ አሻናኔ ኢ አሹዋ ማዲጋና፤ ያቲዲ ኤንቲ ኢዮ ታማን ፁጋና።¹⁷ ሂዳ፣ ያሳ ቃላይ ፖሌታና ጋካናው ኤንታ ቆፋይ ኢሲኖ ጊዳና ሜላ ኤንቲ ባንታ አይሲያ ዎልቃ ደዓስ ኢማናዳኔ ያሳይ ቆፐዳይሳ ኤንቲ አሳናዳ ኤንታ ዎዛናን ያሳይ አዋ ዎሊስ።¹⁸ ሄ ኔኒ ቤዒዳ ማጫሲያ ሳዓ ካዎታ ሃሪያ ጊታ ካታሚው» ያጊስ።

17:3 ዮቆ 13:1 17:4 ኤር 51:7 17:8 ዳኔ 7:7፤ ዮቆ 11:7፤ ማዘ 69:28 17:12 ዳኔ 7:24

18

ባቢሎኔ ኩንዴሳ

1 ያተዲ፥ ጌታ ማቲ ዴዲያ ሃራ ኪታንቾይ ሳሎፔ ዎዲሺን ታ ቤዓስ። ሄ ኪታንቾዋ ቦንቾይ ሳዓ ፖዲሲስ። 2 ሄ ኪታንቾይ ባ ቃላ ዶቁ አሲዲ፥

«ኢያ ኩንዳሱ! ጌታ ባቢሎኔይ ኩንዳሱ!
ባቢሎኔይ ቱና አያናቲ አቂያ ቤሲ ጌዳሱ።
ዱማ ዱማ ኢታባታስ ኬሴ ጌዳሱ፤
ቱና ካፎቲኔ ዶዓቲ ሽምፒያ ቤሲ ጌዳሱ።

3 አሳ ዜሬሲ ኡባ ባ ላይማቴሳ ዎይኒያ ኡሻሱ።
ሳዓ ካዎቲ ኢራ ላይማቲዶሶና።

ኢ ሚኮቴሳፌ ዴንዶይሳን
ቢታን ዴዲያ ዛልዓንቾቲ ዱሬቲዶሶና»
ያጊስ።

4 ሄሳፌ ጉዩ፥ ታ ሳሎፔ ሃይሳዳ ያጊያ ሃራ ቃላ ሲዓስ።
«ኢ ናጋራ ኢራ ኮዎና ሚላኔ፥

ኢያ ኤካናው ዴዲያ ሴራ ሂንቴ ኤኮና ሚላ፥
ታ ዴሪያው ኢፔ ኬዩቴ።

5 ሂዛ፥ ኢ ናጋራይ ሳሎ ጋካናው ዶሬቲስ።
ያሳይ ኢ ናቁዋ አኬኪስ።

6 ኢያ ኢሚዳይሳ ሚላ ዛሪዲ ኢው ኢሚቴ።
ኢያ አሲዳ አሱዋስ ናምዑ ኩሼ ኢው ዛሪቴ።
ኢያ ጊጊሲዳ ኡሻ ቦላ ሂንቴ ናምዑ ኩሼ ማሶያ ኡሻ ኢ
ፁዓን ኩንሲቴ።

7 ኢያ ቦንቾቲዳይሳዳኔ ኢው ኢንጄቲዳይሳ ሚላ፥
ኢዮ ሚቶሲቴኔ ካዮዩቴ።

ኢያ ባ ዎዛናን፥
(ታኒ ካዌዳ ኡታስ፤ ታ አዚኒ ባይና ማጫስ ጊዲኬ፤
ታኒ ኡባካ ካዮቴኬ) ያጋሱ።

8 ሄሳ ጊሾ፥ ቦሻ ኡባይ፥
ሃርጊይ፥ ካዮይኔ ኮሺ ኢዮ ኢሲ ጋላስ አይካና።

ቃሲ ኢያ ታማን ፁጌታና፤
አይስ ጊኮ፥ ኢ ቦላ ፒርዲያ ያሳይ ዎልቃማ»

ያጊስ።

18:2 ኢ.ሳ 21:9፤ ኤር 51:8፤ ዮ.ቆ 14:8፤ ኢ.ሳ 13:21፤ ኤር 50:39 18:3
ኢ.ሳ 23:17፤ ኤር 51:7 18:5 ሚዴ 18:20 18:6 ማዝ 137:8፤ ኤር 50:29
18:8 ኢ.ሳ 47:7-9

9 «ኢራ ላይማቲዳይሳቲኔ ኢ ሚኮቴላን ዴዲዳ፥ አላሚያ ካዎቲ ሄ ካታሚያ ፀጌቲን ኬያ ጩያ ቤዲዳ ዎዴ ኢው ዋሲዳ ዩካና።

10 ኤንቲ ሄ ካታሜ ዋያ ቤዲዲ ያዩዳ ጊሾ ሃኪ ኤቂዲ፥

ሃ ጊታ ካታሜ! ዎልቃማ ካታሜ!

ባቢሎኔ፥ ኔና አዩ!

ኔኔ ኢሲ ሳቴ ጊዶን ኔ ፒርዳ ኤካዳሳ) ያጋና።

11 «ኤንታ ማርካቢያ ጫና ሂዛፔ ሻሚያ አሲ ባይና ጊሾ ሳዓን ዴዲያ ዛልዓንቾቲ ሄ ካታሜስ ዋሳናኔ ካዮታና። 12 ኤንታ ዎርቃ፥ ቢራ፥ ቦንቾ ሹቻ፥ ኢንቆ ጊያ አልዎ ሹቻ፥ ካሎሴ ማዎ፥ ሊኖ ማዎ፥ ሃራ ማዎ፥ ዞዎ ማዎ፥ ዱማ ዱማ ሳዎ ሚሳ፥ ዛሴ፥ አልዎ ሚሳ፥ ናሴ ቢራታ፥ ጎሌ ሹቾ፥ 13 ቃራፋ፥ ቂማሜ፥ ኢፃኔ፥ ካርቤ፥ ሺቶ፥ ዎይኔ፥ ዛይቴ፥ ሊቆ ዲሌ፥ ጊስቴ፥ ሜሄ፥ ዶርሴ፥ ፓራ፥ ፓራ ጋራ፥ አይሌታኔ ሃራ አሳታ ሻሚያ አኒካ ባዋ።

14 «ዛልዓንቾቲ ማጫሴኮ፥ (ኔኔ አዎቲዳ ሎዎባ ኡባይ ኔፔ ዳይስ፥ ኔ አቆይኔ አሌቂቲዳባ ኡባይ ኔፔ ሃኪስ፥ ኔኔ ዛራዳ ኤንታ ኡባ ዴማካ) ያጊዶሶና። 15 ሄ ካታማን ዛልዲዲ ዱሬቲዳ ዛልዓንቾቲ ኢ ሜቴዋ ባቢዲ ኢፔ ሃኪዲ ኤቃና። ኤንቲ ዩካናኔ ካዮታና። 16 ቃሲ፥

ሊኖ ማዎ፥ ካሎሴ ማዎኔ ዞዎ ማዎ ማዓዳ፥

ዎርቃን፥ ቦንቾ ሹቻኔኔ ኢንቆ ጊያ አልዎ ሹቻን አሌቂቲዳ፥

ሄ ጊታ ካታሜስ አዩ! 17 ሃይሳ ሜላ ጊታ ሻሎ ኡባይ ኢሲ

ሳቴ ጊዶን ዳይስ) ያጊዶሶና።

«ማርካቢያ ላጊያ ኡባይ፥ ማርካቢያን ቢያ ኡባይ፥ ማርካቢያ ቦላ አሲያ ኡባይኔ አባን ዛልዲያ ኡባይ ሃኪ ኤቂዶሶና። 18 ሄ ካታሚያ ፀጌቲን ኬያ ጩያ ቤዲዳ ዎዴ (ሃ ጊታ ካታሚው ዳኒያ ሃራ ካታሚ ዴዲሻ?) ያጊዶሶና። 19 ኤንቲ ባንታ ሁዔን ባና ቆሊዲ፥ ዋሲዶሶናኔ ካዮቲዶሶና።

አባ ቦላ ማርካቢቲ ዴዲያ ኡባይ፥

ኢ ሻሎዎን ዱሬቲዳ ኡባይ፥

ሄ ካታሚያ ኢሲ ሳቴን ዳይዳ ጊሾ

አዩ! አዩ!

20 ሳሎዎው፥ ኢ ዳይዎን ኡፋይታ!

ጌሻቶ፥ ሃዋሬቶ፥ ናቤቶ፥

ዎሳይ ሂንቴ ጊሾ ኢ ቦላ ፒርዲዳ ጊሾ ኡፋይቲቴ።) ያጊዶሶና።»

18:9 ሂዝ 26:16-17 18:11 ሂዝ 27:31 18:12 ሂዝ 27:12፣ 13፣ 22
18:15 ሂዝ 27:31 18:17 ኢሳ 23:14፣ ሂዝ 27:26 18:18 ሂዝ 27:32
18:20 ሂዝ 27:30፣ ዛሬ 32:43፣ ኤር 51:48

21 ያቲን፥ ሚኖ ኪታንቾይ ዎፃ ዳኒያ ጊታ ሹቹ ዴንሲዲ አባን ሆሊሼ፥ «ጊታ ካታሚያ ባቢሎኔይ ዎልቃን ሆሌታዳ ሃይሳዳ ኩንዳና፤ ኢያ ሃቺፌ ጉዬ ኡባካ ቤንቱኩ። 22 ዲሲ ዲዌይሳቲኔ ዩዌይሳቲ፥ ሱሱልዔኔ ሞይዜ ፑኔይሳቲ፥ ሂዛፕ ጉዬ ኔ ጊዶን ኡባካ ሲዔቶኮና። አይ ኮቻ ዛልዔ ዛልዒያ አሲካ ኔ ጊዶን ቤንቴና። ዎፃ ጊርሲ ሂዛፕ ጉዬ ኔ ጊዶን ሲዔቴና። 23 ዎምፕ ፖዖይ ዛሪዲ ኔ ጊዶን ፖዔና። ማቾ ኤኬይሳኔ አዚና ጌሊያሪ ቃሊ ሂዛፕ ጉዬ ኔ ጊዶን ሲዔቴና። ኔ ዛልፃንቾቲ ቢታ ኡባን ኤሬቲዳ ዎልቃማታ። ኔ ቢታን ካዎቴሳታ ኡባ ጨማዳሳ» ያጊስ።

24 ናቤታ ሱሳይ፥ ጌሻታ ሱሳይኔ ቢታ ቦላ ሃይቂዳ አሳ ኡባ ሱሳይ ኢ ጊዶን ቤንቴዳ ጊሾ ባቢሎኔይ ፒርዴታሱ።

19

1 ያቲን፥ ሳሎን ዳሮ አሳይ፥
«ዎሳይ ጋላቴቶ!
አቶቴሳይ፥ ቦንቾይኔ ዎልቃይ ኑ ያሳስ ጊዶ።

2 ኢያ ፒርዳይ ቱማኔ ሂሎ።
ሳፃ ቱኒሲዳ ኢታ ላይሚው ያሳይ ፒርዲስ።
ዎሳይ ባ አይሌታ ሱሳ ኢፕ አቺስ»
ያጊሺን ሲፃስ።

3 ሄ አሳይ ዛሪዲ ባንታ ቃላ ጶቁ አሲዲ፥
«ዎሳ ጋላቲ ጋኮ።
ሄ ካታሚያ ሜሪናው ጨያሼ ዳና»
ያጊዶሶና።

4 ላታማኔ አይዱ ጨማቲኔ ዴዎን ዴዒያ አይዱ ሜዴቴሳቲ አራታን ኡቲዳ ያሳስ ጉፋኒዲ፥
«አሚንዒ! ዎሳ ጋላቲ ጋኮ»
ያጊዲ ጎይኒዶሶና።

5 ያቲን፥
«ዎሳ አይሌቲ፥
ዎሴ ያያ ጉሲኔ ጊቲ ኡባይ፥
ኑ ያሳ ጋላቲቴ»
ያጊያ ቃላይ አራታፕ ኬዪስ።

18:21 ኤር 51:63 18:22 ኢሳ 24:8፤ ሂዛ 26:13 18:22 ኤር 7:34፤
25:10 18:24 ኤር 51:49 19:2 ዛሬ 32:43፤ 2ካዎ 9:7 19:3 ኢሳ
34:10 19:5 ማዝ 115:13

6 ያቲን፥ ዳር አሳዳ ዎጫሚያ፥ ዎልቃማ ሻፋዳ ጉሚያ፥ ዳዳዳ ዴቺያ ጊርሳይ፥

«ዎሳ ጋላቲ ጋኮ፤

ኑ ጎዳይ፥ ኡባፌ ዎልቃማ ዎሳይ ካዎቲስ።

7 ዶርሳ ያጋኖይ ጋኪዳ ጊሾኔ ኢያ ጌሊያራ ጊጊዳ ጊሾ

ኑ ኡፋይቶስ፥ ጋላቶሲኔ ዶርሳ ቦንቾስ።

8 ጌሎስ ጊጊዳራ ጳሊያኔ ጌሺ ጊዲዳ

ሊኖ ማዎ ማዓና ሜላ ኢው ኢሜቲስ»

ያጊሺን ታ ሲዓስ። (ሊኖ ማዎይ ጌሻታ ጊሎ አሶ ሌሚሶ።)

9 ሄሳፌ ጉዩ፥ ኪታንቾይ ታኮ፥ «ዶርሳ ያጋኑዋ ጌጌቲዳይሳቲ አንጄቲዳይሳታ» ጋዳ ጎፋ። ሄ ኪታንቾይ ጉጂዲ፥ «ሃይሲ ዎሳ ቱማ ቃላ» ያጊስ።

10 ሄ ዎዴ ታ ኢያ ጎይናናው ኢያ ቶሁዋ ቦላ ኩንዳስ። ሺን ኢ፥ «ሄሳ አሶፋ! ታኔ ዩሱሳባ ማርካቲያ ኔ ሜላኔ ኔ ኢሻታ ሜላ፥ ኔ ዎሳ ጎይና» ያጊስ። ሂዛ፥ ዩሱሳባ ማርካቲዳይሳታስ ናቤቴላ አያኔ ዴዔስ።

ቦላ ፓራ ቶጊዳይሳ

11 ያቲን፥ ሳሎይ ዶዩቲን፥ ያን ቦላ ፓሪ ዴዔይሳ ቤዓስ። ሄ ፓራ ቶጊዳይሲ አማኔቲዳይሳኔ ቱማንቾ ጌቴቱስ። ኢ ጊሎቴላን ፐርዴሲኔ አሌቴስ። 12 ኢያ አይፌይ ታማ ላጮ ዳኔስ፤ ኢያ ሁዔን ዳር ካላቺ ዴዔስ። ኢያ ቦላ ኢ አቲን ሃሪ አኒካ ኤሮና ግፌቲዳ ሱንሳ ዴዔስ። 13 ኢ ሱሳን ሙኬቲዳ ማዎ ማዒስ፤ ኢያ ሱንሳይካ ዎሳ ቃላ። 14 ጳሊያኔ ጌሺ ጊዲዳ ሊኖ ማዎ ማዒዳ ሳሎ አላንቾቲ ቦላ ፓራታ ቶጊዲ ኢያ ጌዶ ካሎሶና። 15 ካዎቴላታ ቃንጊያ ማሺ ኢያ ዶናፔ ኬዩስ። ኢ ቢራታ ግምዓን አሳ ሃራና። ኡባፌ ዎልቃማ ዎሳ ሃንቆ ዎይኔ ኡሻ ጉምዒያ ቤሳ ኢ ዩዳና።

16 ኢያ ማዐቀ ቦላኔ ኢያ ዎዲሪያ ቦላ፥ «ካዎታ ካዉዋኔ ጎዳታ ጎዳ» ያጊያ ሱንሳይ ግፌቲስ።

17 ሄሳፌ ጉዩ፥ ኢሲ ኪታንቾይ አዋ ቦላ ኤቂዳይሳ ቤዓስ። ሄ ኪታንቾይ ሳሎራ ፐራዲያ ካፎ ኡባስ ባ ቃላ ጶቁ አሲዲ፥ «ሃ ዩቴ! ዎሳ ጊቢራ ማናው ኢሲ ቤሲ ሺቂቴ። 18 ዩዲ ካዎታ አሹዋ፥ ሻላቃታ አሹዋ፥ ዎታዳሬታ አሹዋ፥ ፓራታ አሹዋ፥ ፓራታ ቶጊይሳታ አሹዋ፥ አሳ ኡባ አሹዋ፥ አይሌታ አሹዋ፥ ዎማኖታ አሹዋ፥ ጊታታኔ ጉሳታ አሹዋ ሚቴ» ያጊስ።

19:6 ሂዝ 1:24፤ ማዝ 93:1፤ 97:1፤ 99:1 19:9 ማቶ 22:2 19:11 ሂዝ 1:1 19:12 ዳኔ 10:6 19:15 ማዝ 2:9፤ ኢሳ 63:3፤ ኢዩ 3:13፤ ዮቆ 14:20 19:17 ሂዝ 39:17-20

19 ደዓይ፥ ፓራ ቶጊዳይሳራኔ ኢያ አላንቸታራ አሌታናው ሳዓ ካዎቲኔ ኤንታ አላንቸቲ ኢሲ ቤሲ ሺቂዳሺን ቤዓስ። 20 ሺን ሄ ደዓይኔ ኢያ ሱንሳን ማላታታ አሲዳ ዎርዶ ናቤይ ኢያራ ኢሲፌ አይኪቲስ። ሄ ማላታታን ደዓ ማላይ ዴዔይሳታኔ ኢያ ሚሲሊያ ጎይኔይሳታ ኢ ባሌሲስ። ደዓይኔ ዎርዶ ናቤይ ናምዓይካ ዲኔን ኤጊያ ታማ አባን ፓፃ ዩጌቲዶሶና። 21 አቲዳይሳቲ ፓራ ቶጊዳይሳ ዶናፔ ኬያ ማሻን ሃይቂዶሶና። ካፎቲ ኡባይ ኤንታ አሹዋ ሚዲ ካሊዶሶና።

20

ሙኩሉ ላይሲ

1 ዛዊ ባይና አላ ቁልፒያኔ ጊታ ሳንሳላታ ባ ኩሼን አይኪዳ ኢሲ ኪታንቸይ ሳሎፔ ዎዲሺን ቤዓስ። 2 ኢ ዳዊያ አይኪዲ ሙኩሉ ላይሳስ ቃቺስ። ሄ ዳዌይ ኮይሮ ሾሻ፥ ዳቡሎሳ ዎይኮ ፃላሄ። 3 ኪታንቸይ ዛዊ ባይና አላን ኢያ ዩጊዲ፥ ሙኩሉ ላይሲ ዉራና ጋካናው ካዎቴሳታ ዛሪ ባሌሶና ሜላ ቁልፔን ጎርዲዲ አታሚስ። ሄሳፌ ጉዩ፥ ዳዌይ ጉሳ ዎዴስ ቢሌታናው ቤሴስ።

4 ሄሳፌ ጉዩ፥ አራታታኔ አራታታ ቦላ ኡቲዲ ፒርዳና ሜላ ማቲ ኢሜቲዳይሳታ ቤዓስ። ዩሱሳስ ማርካቲዳ ጊሾኔ ያሳ ቃላ አዲዳ ጊሾ ባንታ ቆዲያ ጎይሬቲዳ አሳ ሼምፑዋ ቤዓስ። ኤንቲ ደዓ ዎይኮ ደዓ ሚሲሊያ ጎይኒቦኮና። ኤንቲ ደዓ ማላ ባንታ ሰምዖን ዎይኮ ባንታ ኩሼን ዎሲቦኮና። ኤንቲ ሃይቆፔ ዴንዲዲ ኪሪስቶሳራ ኢሲፌ ሙኩሉ ላይሲ ሃሪዶሶና። 5 ሃይሲ ኮይሮ ዴንዱዋ፤ አቲዳ ሃንኮ ሃይቂዳይሳቲ ሙኩሉ ላይሳይ ዉራና ጋካናው ሃይቆፔ ዴንዲቦኮና። 6 ኮይሮ ዴንዱዋስ ቃዲ ዴዔይሳቲ አንጄቲዳይሳታኔ ጌሻታ። ኤንታ ቦላ ናምዓንሶ ሃይቁዋስ ዎልቂ ባዋ። ኤንቲ ያሳሲኔ ኪሪስቶሳስ ካሂኔ ጊዳና፤ ኢያራ ኢሲፌ ሙኩሉ ላይሲ ሃራና።

ፃላሂያ ዶኔቴሳ

7 ሙኩሉ ላይሳይ ዉራዳፔ ጉዩ ፃላሄይ ቃሾፔ ቢሌታና። 8 ኢ ሳዓ ጋፃፔ ጋፃ ጋካናው ዴዒያ ካዎቴሳታ፥ ኤንቲካ፥ ጎኔኔ ማጎኔ ጌቴቴይሳታ ባሌሲዲ አላስ ሺሻናው ኬያና። ኤንታ ፓይዶይ አባ ጋፃን ዴዒያ ሻፌ ሜላ። 9 ኤንቲ ቢታ ኡባን ላሌቲዲ፥ ጌሻታ ሄራኔ ያሳይ ዶሲያ ካታማ ቴቂዶሶና። ሺን ታሚ ሳሎፔ ዎዲዲ ኤንታና ሚስ።

10 ኤንታ ባሌሲዳ ገላሄይ፥ ዶዓይኔ ዎርዶ ናቤይ ዩጌቲዳ ኤጊያ ዲኔ ታማ አባን ዩጌቲስ። ኤንቲ ቃማኔ ጋላስ ሜሪናው ፓፃ ካዔታና።

ዉርሴሳ ፒርዳ

11 ሄሳፌ ጉዩ፥ ጊታ ቦላ አራታ ቦላ ኡቲዳይሳ ቤዓስ። ሳዒኔ ሳሎይ ኢያ ሲንሳፌ ባቃቲዶሶና፤ ኤንቲ ዛሪ ቤንቲቦኮና።
12 ሃይቂዳይሳቲ፥ ጊታቲኔ ጉሳቲ አራታ ሲንሳን ኤቂዳይሳታ ቤዓስ፤ ማፃፋቲ ዶዩቲዶሶና፤ ቃሲ ዴዎ ማፃፋ ጊዲዳ ሃራ ማፃፌ ዶዩቲስ። ሃይቂዳይሳቲ ማፃፋን ፃፌቲዳ ባንታ አሱዋዳ ፒርዳ ኤኪዶሶና። 13 አባይ ባ ጊዶን ዴዒያ ሃይቂዳይሳታ ኢሚስ፤ ሃይቆይኔ ሲዎሌይ ባንታ ጊዶን ዴዒያ ሃይቂዳይሳታ ኢሚዶሶና። ኢሲ ኢሲ አሲ ባ አሱዋዳ ፒርዳ ኤኪስ። 14 ያቲን፥ ሃይቆይኔ ሲዎሌይ ታማ አባን ዩጌቲዶሶና። ሄ ታማ አባይ ናምፃንፉ ሃይቆ። 15 ዴዎ ማፃፋን ኢያ ሱንሳይ ፃፌቲቦና አኒካ ታማ አባን ዩጌቲስ።

21

አራሳ ሳሎኔ አራሳ ሳዓ

1 ታኒ አራሳ ሳሎኔ አራሳ ሳዓ ቤዓስ። ኮይሮ ሳሎይኔ ኮይሮ ሳዓይ ዳይስ፤ አባይካ ዳይስ። 2 ጌሻ ካታሚያ፥ አራሳ ዩሩሳላሜይ፥ አዚና ገላናው አሌቄታዳ ጊጋዳ ዴዒያ ማጫሳዳ ሳሎፔ ዶሳ ማታፔ ዱጊ ዎዲሺን ቤዓስ።
3 አራታፔ ሃይሳዳ ያጊዲ፥ አዲያ ጊታ ቃላ ሲዓስ፤ «ዶሳ ኬሳይ አሳራ ዴዒስ፤ ዶሳይ ባ ቦንቹዋራ አሳራ ኢሲፌ ዳና። ኤንቲ ኢያ ዴሬ ጊዳና፤ ዶሳይ ባ ሁዒን ኤንታራ ዳና፤ ኢ ኤንታ ዶሳ ጊዳና።
4 ዶሳይ ኤንታ አይፌፔ አፉሳ ኡባ ቁቻና። ሂዛፔ ሃይቆይ ዎይኮ ካዮይ ዎይኮ ዋሶይ ዎይኮ ዋዩይ ዴና። ጋልዓ አባይ አዲስ» ያጊስ።
5 አራታ ቦላ ኡቲዳይሲ፥ «ታኒ ኡባ አራሲ አሳና» ያጊስ። ቃሲ ዛሪዲ ታኮ፥ «ታኒ አዴይሲ አማንፎይሳኔ ቱማ ጊዲያ ጊሾ ፃፋ» ያጊስ። 6 ቃሲ ታኮ፥ «ፖሌቲስ! ታኒ አልፋኔ አሜጋ፤ ደሜሲኔ ፖሎ። ሳሞቲዳ አናካ ዴዎ ሃሳ ፑልቱዋፌ ጨጊ ባይና ሙ ኡሻና። 7 ዶኒያ አኒካ ሄሳ ኡባ ሳታና፤ ታኒ ኢያው ዶሳ ጊዳና፤ ኢካ ታ ናዓ ጊዳና። 8 ሺን ያሻንቾታ፥ አማኔቶናይሳታ፥ ቱናታ፥ ሽምፖ ዎዲይሳታ፥ ላይማቴይሳታ፥ ቢቴይሳታ፥ ኤቃ

20:11 ዳኔ 7:9-10 21:1 ኢሳ 65:17፤ 66:22፤ 2ጴጊ 3:13 21:2 ኢሳ 52:1፤ ዮቆ 3:12፤ ኢሳ 61:10 21:3 ሂዝ 37:27፤ ለቄ 26:11 21:4 ኢሳ 25:8፤ ኢሳ 35:10፤ 65:19 21:6 ኢሳ 55:1 21:7 2ሳሙ 7:14፤ ማዝ 89:26

ጎይይሳታኔ ዎርዳንቾታ ቃዳይ ዲኔይ ኤጊያ ታማ አባን ጊዳና። ሄሲ ናምዓንሶ ሃይቆ» ያጊስ።

9 ላፑን ዉርሴሳ ቦሻቲ ኩሚዳ ላፑን ፀዓታ አይኪዳ ላፑን ኪታንቾታፕ ኢሶይ ታኮ ዪዲ፥ «ሃያ፥ ታኒ ኔና ጌሎስ ጊጊዳ ዶርሳ ማቺው ቤሳና» ያጊስ። 10 ኪታንቾይ ታና ዳር ጶቃ ዴሪያ ሁዔ ጊሻ አያናን ኬሲዲ፥ ጊሻ ካታማይ፥ ዩሩሳላሜይ፥ ሳሎፕ ያሳ ማታፕ ዱጌ ዎዲሺን ቤሲስ። 11 ሄ ካታማይ ያሳ ቦንቾን ፖዔስ። ሄ ካታማ ፖያይ ያስጲዴ ጊያ አልዎ ሹቻ ሜላ፤ ጊሻ ቢሪሌዳ ጳሌስ። 12 ሄ ካታማ ዲርሳይ ዎልቃማኔ አዱሴ። ኢያው ታማኔ ናምዑ ፔንጌቲኔ ሄ ፔንጌታ ናጊያ ታማኔ ናምዑ ኪታንቾቲ ዴዎሶና። ፔንጌታ ቦላ ታማኔ ናምዑ ኢስራዔል ዜሬሳታ ሱንሳይ ሃሬቲስ። 13 ዶሎሃ ባጋራ ሄኹ ፔንጌቲ፥ ፑዴሃ ባጋራ ሄኹ ፔንጌቲ፥ ዱጌሃ ባጋራ ሄኹ ፔንጌቲኔ ዉሎሃ ባጋራ ሄኹ ፔንጌቲ ዴዎሶና። 14 ካታማ ጊምቤ ዲርሳይ ታማኔ ናምዑ ሹቻ ባሶታ ቦላ ኤቂስ። ኤንታ ቦላ ታማኔ ናምዑ ዶርሳ ሃዋሬታ ሱንሳይ ሃሬቲስ።

15 ታው አዲያ ኪታንቾዋስ፥ ካታማ፥ ኢያ ፔንጌታኔ ኢያ ዲርሳ ዋዲያ ዎርቃ ሃምዓይ ዴዔስ። 16 ካታማስ አይዱ ማዛኔቲ ዴዎሶና፤ ካታማ ጊሳይኔ ጎምፓይ ኢሲ ጊና። ኪታንቾይ ካታማ ባ ሃምዓን ዋዲን፥ ካታማይ ታማኔ ናምዑ ሙኩሉ ኪሎ ሚቲሬ ጊዲስ፤ ካታማ ጊሳይ፥ ጎምፓይኔ ጶቃቴሳይ ኢሲ ጊና። 17 ኪታንቾይ ቃሲ ዲርሳ ዋዲን፥ ኪታንቾይ ጎዔቲያ አሳ ኩሼን ኢሲ ያታኔ አይታማኔ አይዱ ዋዲ ጊዲስ።

18 ካታማ ዲርሳይ ያስጲዴ ጊያ ሹቻን ዲሬቲስ። ካታማይ ማስቶቴዳ ጳሊያ ጊሻ ዎርቃን አሴቲስ። 19 ካታማ ዲርሳ ባሶይ ኡባ ቆሞ ቦንቼቲዳ ሹቻን አሌቁቲስ። ኮይሮ ሂዳቲዳ ሹቻይ ያስጲዴ፥ ናምዓንሶይ ሳምፔሬ፥ ሄኻንሶይ ኬልቆዶኔ፥ አይዳንሶይ ባሉሬ፥ 20 ኢቻሻንሶይ ሳርዶንኪሴ፥ ኡሱፑንሶይ ሳርዲዶኔ፥ ላፑንሳይ ኪሪስቲሎቤ፥ ሆስፑንሶይ ቢሪሌ፥ ኡዱፉንሶይ ቶጳዚዮኔ፥ ታማንሶይ ኪሪስጲራሲሴ፥ ታማኔ ኢሲንሶይ ያኪንቴ፥ ታማኔ ናምዓንሶይ አሜቴስጊኖሴ።

21 ታማኔ ናምዑ ፔንጌታስ ታማኔ ናምዑ ኢንቆ ጊያ አልዎ ሹቹ ዴዔስ። ኢሲ ኢሲ ፔንጌይ ኢሲ ኢንቆን አሴቲስ። ካታማ ዎጋ አጌይ ማስቶቴዳ ጳሊያ ጊሻ ዎርቃሬ አሴቲስ።

22 ጎዳይ፥ ኡባሬ ዎልቃማ ያሳይኔ ዶርሳይ ካታማስ ኬሌ ጊዲያ ጊሻ ታ ሄ ካታማን ያሳ ኬሌ ቤዓቢኬ። 23 ያሳ ቦንቾይ ሄ ካታማስ ፖዲያ ጊሻኔ ዶርሳይ ኢያው ያምፕ ጊዲያ ጊሻ

21:10 ሂዝ 40:1 21:12 ሂዝ 48:30-35 21:15 ሂዝ 40:3 21:21 ኢሳ 54:11-12

ከታማስ አዋ ዎይኮ አጌና ፖዎ ኮሼና። 24 ከዎቴሳቲ ሄ ከታማ ፖዎን ሃሙታና፤ ከዎቲካ ባንታ ቦንቹዋ ያ ኤሃና። 25 ቃሚ ያን ባይና ጊሾ ከታማ ፔንጌቲ ኡባ ዎዴ ዶያ ጊዳና፤ ጎርዴቶኮና። 26 ከዎቴሳታ ጊታቴሳይኔ ቦንቹይ ሄ ከታማ ያና። 27 ዶርሳ ዴዎ ማፃፋን ሱንሳይ ፃፊቲዳይሳታ ፃላሊ አቲን ቱናባ ዎይኮ ዩላያባ አሴይ ዎይኮ ዎርዶቱይ አኒካ ሄ ከታማ ጌሌና።

22

1 ያቲዲ፥ ኪታንቹይ ታና ያሳ ከዎቴሳ አራታፔኔ ዶርሳ ከዎቴሳ አራታፔ ጎጊያ ማስቶቴዳ ጳሊያ ዴዎ ሃሳ ሻፋ ቤሲስ። 2 ሄ ሻፋይ ከታማ አጊያ ጊዶራ ዱጌ ጎጌስ። ሻፋፔ ሄሬንሳ ባጋራኔ ሃፊንሳ ባጋራ አጌናን ኢሲ ቶሆ፤ ሳይሳን ታማኔ ናምዑ ቶሆ አይፊያ ዴዎ ሚሲ ዴዴስ። ሄ ሚሳ ቦንጮይ ከዎቴሳታ ኡባ ሃርጌፊ ፓሴስ።

3 ሄ ከታማን አይቢ ቃንጌሲካ ዴና። ያሳ ከዎቴሳ አራታይኔ ዶርሳ ከዎቴሳ አራታይ ሄ ከታማን ዳና። ያሳ አይሌቲ ያሳስ አሳና። 4 ኤንቲ ኢያ ሰምዑዋ ቤዓና፤ ኢያ ሱንሳይ ኤንታ ሰምዎን ፃፊታና። 5 ሂዘፔ ቃሚ ዴና፤ ጎዳ ያሳይ ኤንታው ያምፔ ጊዲያ ጊሾ ኤንታው ያምፔ ዎይኮ አዋ ፖዎ ኮሼና። ኤንቲ ሜሪ ሜሪናው ከዎታና።

ዩሱሳ ዩሳ

6 ኪታንቹይ ታኮ፥ «ሃ ታ አዲያ ቃላይ ቱማኔ አማንሴይሳ። ጎዳይ፥ ናቤታ ባ ጊሻ አያናን ኪቲያ ያሳይ፥ ማታን ሃናናባ ባ አይሌታ ቤሳናው ባ ኪታንቹዋ ኪቲስ» ያጊስ። 7 ዩሱሲ፥ «ሄኮ ታ ኤሌሳዳ ያና፤ ሃ ማፃፋን ዴዲያ ቲንቢቱ ቃላ ናጊያ አኒካ አንጄቲዳይሳ» ያጊስ።

8 ታኒ፥ ዮሐንሲ፥ ሄ ኡባባ ሲዓስ፤ ቤዓስ። ታኒ ሄሳ ሲዒዳ ዎዴኔ ቤዒዳ ዎዴ ሄሳ ታና ቤሲዳ ኪታንቹዋ ጎይናናው ኢያ ቶሁዋ ቦላ ኩንዳስ። 9 ሺን ኪታንቹይ ታኮ፥ «ሄሳ አሶፋ! ታኒ ኔዳ፥ ናቤታዳ ኔ ኢሻታዳኔ ሃ ማፃፋን ዴዲያ ኡባ ኪቱቲያ አይሌታ ሜላ፤ ያሳ ጎይና» ያጊስ።

10 ኪታንቹይ ዛሪዲ፥ «ሃ ኡባይ ፖሌቲያ ዎዴይ ማታቲዳ ጊሾ ሃ ማፃፋን ፃፊቲዳ ቲንቢቱ ቃላ ማታሜን ጎርዶፋ። 11 ኢታ አሴይ

21:23 ኢሳ 60:19 21:24 ኢሳ 60:3 21:25 ኢሳ 60:11 21:27 ኢሳ 52:1፤ ሂዘ 44:9 22:1 ሂዘ 47:1፤ ዛካ 14:8 22:2 ሜዴ 2:9 22:3 ዛካ 14:10 22:5 ኢሳ 60:19፤ ዳኔ 7:18

ጉጂዲ ኢታ አሉ፤ ቱኔይ ጉጂዲ ቱኖ። ሎዎ አሴይ ጉጂዲ ሎዎ አሉ፤ ጌዬይ ጉጂዲ ጌዮ» ያጊስ።

12 ዩሱሲ፥ «ሄኮ፥ ታኒ ኤሌሳዳ ያኖ። ኢሱዋስ ኢሱዋስ ኢያ አሱዋዳ ኢማናው ታ ዎይቶይ ታራ ዴዔስ። 13 ታኒ አልፋኔ አሜጋ፤ ኮይሮኔ ወርሴሲ፤ ዶሜሲኔ ፖሎ።

14 «ባንታ ማዑዋ ሜጨዲ ጌሼይሳቲ አንጄቲዳይሳታ። ዴዎ ሚሴ አይፊያ ማናውኔ ካታማ ፔንጊያራ ጌላናው ኤንታው ማቲ ኢሜቲስ። 15 ሺን ካናቲ፥ ቢቴይሳቲ፥ ላይማቴይሳቲ፥ ሽምፖ ዎዴይሳቲ፥ ኤቃ ጎይኔይሳቲ፥ ዎርዶ ዶሴይሳቲኔ አሴይሳቲ ካሬን ዴዎሶና።

16 «ታኒ፥ ዩሱሲ፥ ሃ ማርካቴሳ ሂንቴው፥ ዎሳ ኪሳታስ አዳና ሜላ ታ ኪታንቸዋ ኪታስ። ታኒ ዳዊቱ ሽሺኔ ዜሬሲ። ታኒ ፖዲያ ጉራ ባካላ» ያጊስ።

17 ጌሻ አያናይኔ ጌላናው ጊጊዳ ማጫሲያ፥ «ሃያ» ያጎሶና። ቃሲ ሃይሳ ሲዲያ አኒካ፥ «ሃያ» ያጎ። ሳሞቲዳ አኒካ ሃዮ፤ ዴዎ ሃሳ ኮያ አኒካ ጮ ኤኮ።

18 ታኒ ሃ ማፃፋን ፃፌቲዳ ቲንቢቴ ቃላ ሲዲያ አናካ ዞራይስ። አኒካ ሃ ቃላ ቦላ ኢሲባ ጉጂኮ፥ ዎሳይ ሃ ማፃፋን ፃፌቲዳ ቦሻ ኢያ ቦላ ጉጃና። 19 አኒካ ማፃፋን ዴዲያ ቲንቢቴ ቃላፔ ኢሲባ ፓጨሲኮ፥ ዎሳይ ሃ ማፃፋን ፃፌቲዳ ዴዎ ሚሳ አይፊያፔኔ ጌሻ ካታማፔ ኢያ ቃዳ ፓጨሳና።

20 ሃ ኡባ ማርካቴይሲ፥ «ቱማ፥ ታኒ ኤሌሳዳ ያኖ» ያጊስ።

አሚንዲ፤ ጎዳ ዩሱሳ፥ ሃያ።

21 ጎዳ ዩሱስ ኪሪስቶሳ አዶ ኬሃቴሳይ ሂንቴ ኡባራ ጊዶ። አሚንዲ።

22:11 ዳኔ 12:10 22:12 ኢሳ 40:10፤ 62:11፤ ማዝ 28:4፤ ኤር 17:10
22:13 ዮቆ 1:8፤ 17፤ 2:8፤ ኢሳ 44:6፤ 48:12 22:14 ሜዴ 2:9፤ 3:22
22:16 ኢሳ 11:1 22:17 ኢሳ 55:1 22:18 ዛሬ 4:2፤ 12:32

አራሳ ጫቁዋ ጎፋሳ
New Testament in Gofa

copyright © 2011 Wycliffe Bible Translators, Inc.

Language: Gofa

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gofa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 12 Mar 2019 from source files dated 12
Mar 2019
c35d6c73-3843-5482-b53e-7559d35deee5